



宋繫太平御覽



403
22



13
403
22



太平御覽卷第一百二十一

偏霸部五

前燕慕容廆

五罪切

慕容皝

音晃

慕容儁

前秦苻洪

苻健

苻生

前燕慕容廆

慕容儁

崔鴻十六國春秋前燕錄曰慕容廆字奕洛瓌昌黎棘城人昔高辛氏遊於海濱留少子厭越以君北夷世居遼左號曰東胡秦漢之際為匈奴所敗分保鮮卑山因復以為號曾祖莫護跋於魏初率其諸部入居遼西從司馬宣王討公孫淵有功拜率義王始建國於大棘城之北見燕代少年多冠步搖冠意甚好之遂斂髮襲冠諸部因呼之步搖其後音訛遂為慕容焉祖木延從母丘儉征高麗有功

新定圖書

此係明八年治
卅八年八月
月諸田一人
卅八年八月
卅八年八月
所購以贈

八幡田中

加號大都督父涉歸以全柳城勳進拜單于遷邑遼東於是漸變胡風自云慕二儀之德繼三光之容遂以慕容爲姓虜身長八尺有大度晉安北將軍張華一見奇之謂曰君後必爲命世之器匡難濟時者也涉卒弟耐立將謀殺虜虜亡潛於遼東徐郁家太康元年國人殺耐迎虜立之太康十年又遷于徒河之青山元康四年定都大棘城所謂紫蒙之邑也永嘉六年王沉承制以虜爲散騎常侍冠軍將軍前鋒大都督大單于皆讓不受擢舉賢才官方授任魯國孔纂宿德清望請爲賓友平原劉讚儒學洽通爲東庠祭酒世子率國胄受業焉太興四年晉遣謁者拜虜使持節督幽平東夷諸軍事車騎將軍平州牧封遼東郡公丹書鐵券承制海東咸和元年加侍中特進八年夏五月薨于文德殿年六十五葬於青山晉遣使者贈車騎大

將軍開府儀同三司謚襄公皝爲燕王追謚武宣王雋稱尊追尊武宣帝廟號高祖
晉書曰虜在位四十九年

慕容皝

崔鴻十六國春秋前燕錄曰慕容皝字元真虜第二子小字萬年長七尺八寸雄毅善權略博學多才藝晉建武元年拜振武將軍永昌初拜左賢王太寧末拜平北將軍朝鮮公咸和八年六月卽遼東公位行平州刺史督攝部內九年八月晉遣謁者拜皝鎮軍大將軍平州刺史大單于遼東公承制一如虜故事二年七月立于儁爲世子四年以左司馬封奕爲左長史九月奕等以皝任重位輕宜稱燕王於是上議十月儁卽燕王位于文德殿大赦境內改備群司以封奕爲相國追尊先公爲武宣王先妣爲王后

起文昌殿出入警蹕立夫人段氏爲王后世子儁爲太子是歲棘城黑石谷有大石自立而行八年七月晉使鴻臚郭恡持節拜皝侍中大都督河北諸軍事大將軍燕王餘如故封諸功臣百餘人九月遷都龍城宮闕十二年四月黑龍一白龍一見于龍山皝率羣寮觀龍去龍二百步祭以太牢二龍交首嬉翔解角而去皝大悅赦境內號新宮曰和龍立龍翔寺于山皝雅好文籍親造太上章以代急就又著典誡十五篇並以教胄子十四年皝親臨東庠考試學生其通經秀異者擢充近侍十月饗群僚于承乾殿右長史宋諺性貪賜布百匹令自負而歸以愧其心十五年八月皝因見白兔馳射之馬倒輦而還宮引太子儁囑以後事謂曰今中原未平方須經建委賢任哲此其時也恪智勇兼濟方堪任重汝其委之以成吾志九月薨于承

乾殿年五十二冬十月葬龍山謚文明王儁稱尊追尊曰文明皇帝廟號太祖陵曰龍平晉書曰皝嘗田于西鄙將濟河見一老父服朱衣乘白馬舉手麾皝曰此非獵所王其還也祕之不言遂濟河連日大獲後見白兔馳射之馬倒被傷乃說所見輦而還宮引儁囑以後事以永和四年死在位十五年

慕容儁

崔鴻十六國春秋前燕錄曰慕容儁字宣英皝第二子小字賀賴跋十三月而生有神光之異身長八尺一寸善屬文雅長辭賦至於器服車室皆著銘讚以爲勸戒皝之八年晉遣使者拜皝燕王以儁爲安北將軍東夷校尉十一年進拜使持節鎮東將軍皝薨卽燕王位赦其境內元年春正月儁依春秋列國故事稱元年五月聞趙亂乃嚴兵

將爲進取之計七月晉使謁者陳沉拜僑侍中河北諸軍事幽冀并平四州牧大將軍燕王承制封拜一如龐統故事元璽元年正月司南車成僑大悅告于統廟四月遣輔國恪相國奕討冉閔戰于魏昌廉臺閔師大敗擒送之閔大將軍蔣幹輔閔子智固守鄴城遣輔弼評等帥騎一萬以討之鄴北郡縣悉降輔國奕等二百一十人勸稱尊號令曰非常之事匪寡德所宜聞也八月尅鄴輔弼評等送閔后董氏太子智太尉申鍾并乘輿服物及六璽送于中山傳國璽蔣幹先已送晉僑欲神其事業言曆運在己乃詐云得之賜閔妻號奉璽君封冉智爲海濱侯以輔弼評爲司州刺史鎮鄴十月輔國恪等三百五人奉皇帝璽十一月僭卽皇帝位于正陽前殿大赦改年時晉遣使詣僑謂之曰還白汝天子我承人乏爲中國所推己爲帝矣庚

午書曰追崇祖考古人之令典武宣王尊爲高祖武宣皇帝文明王爲太祖文明皇帝二年正月立后可足渾氏爲皇后光壽元年正月立中山王暉爲皇太子赦改年初龐有駿馬曰赭白有奇相逸力石虎之伐棘城統將出避難欲乘之馬悲鳴躡嚙人莫能近統曰此馬見異先朝孤嘗仗之濟難今不欲出者蓋先君之旨也乃止虎尋奔退統益奇之至是年四十九歲而駿逸不虧僑比之於鮑氏聰命鑄銅以圖其像親爲銘讚鑄頌其旁置薊城東掖門是月像成而馬死十一月自薊遷鄴二月入鄴宮大赦繕宮殿復銅雀臺以吳王垂爲東夷校尉平州刺史鎮遼東二年三月常山寺大樹自拔根出壁二十七圭七十三光色精奇有異常玉以爲岳神之命遣尙書郎段勤以太牢祀之五月遼西獲黑兔三年三月僑夢石虎齧其齶脣而惡

六子御覽 卷一百一十一 四
之命發其墓剖棺出屍蹈而罵之曰死胡安敢夢生天子
遣御史中尉陽約數其殘酷之罪鞭而投之漳水十二月
雋寢疾謂大司馬恪曰吾患憊頓恐不濟脩短命也復何
所恨但二寇未除景茂冲幼慮其未堪家國多難吾欲遠
追宋宣以社稷屬汝恪曰太子雖幼天縱聰聖必能勝殘
致治不可以亂正統雋怒曰兄弟之間豈虛飾乎恪曰陛
下若以臣堪荷天下之任者寧不能輔少主也雋曰若汝
行周公之事吾復何憂四年正月雋薨於應福前殿年五
十三偽諡景昭皇帝廟號烈祖葬龍陵雋雅好文籍性嚴
重未曾以慢服臨朝雖閑居宴處亦無懈怠之色
晉書曰雋在位十一年自初即位至于末年講論不倦覽
政之暇唯與侍臣錯綜義理凡所著述四十餘篇也

慕容暉

崔鴻十六國春秋前燕錄曰慕容暉字景茂雋之第三子
元璽三年封中山王尋立爲皇太子光壽四年僭卽帝位
大赦改元建熙元年以太原王恪爲太宰錄尚書行周公
事專百揆上庸王評爲太傅副贊朝政司空楊鶩爲太保
吳王垂爲河南大都督十州諸軍事兗州牧鎮梁國四年
正月暉南郊十月太尉奕迎神王和龍初暉委政太宰恪
專受經于博士王勸助教尙鋒祕書郎杜詮竝以明經講
論左右至是通諸經祀孔子于東堂以勸爲國子祭酒鋒
國子博士詮散騎侍郎其執經侍講皆有拜授八年太宰
恪卒九年十二月有神降于鄴自稱湘女有聲與人相接
數日而去十年四月立貴妃可朱渾氏爲皇后六月晉大
司馬桓溫率衆五萬來伐遂至枋頭吳王垂大敗之斬獲
三萬餘級溫奔還淮南垂旣敗溫威德彌振太傅評大不

平之太后遂與評謀殺垂十二月垂出奔秦十一年六月秦輔國將軍王猛鎮南將軍楊安率衆六萬來伐以太傅評下邳王厲等帥精卒三十萬拒秦師于潞川州郡盜賊大起鄴中怪異非常十月評及猛戰于潞川評師敗績單騎遁還猛乘勝追奔長驅至鄴十月苻堅帥衆會猛來攻拔鄴城外亂散騎侍郎徐蔚等率扶餘句麗及上黨質民子弟五百人夜開城北門引納秦師暉與太傅評左衛將軍孟高等數十騎出奔昌黎堅遣將軍郭慶帥騎五千追之及暉于高陽秦將巨虎執暉將縛之暉曰汝何小人而敢縛天子虎曰我梁山巨虎受詔縛賊何謂天子也執暉送鄴堅問其奔狀暉曰狐死首丘欲歸死于先人陵墓堅哀而釋之令還宮率文武出降堅入鄴宮昇正陽殿徙暉及王公已下并諸鮮卑四萬餘戶于長安封暉新興郡侯

邑五千戶尋拜尚書堅征臺城爲平南將軍別部都督淮南之敗隨堅還長安旣而吳王垂攻苻丕于鄴中山王冲起兵關中暉謀殺堅事發爲堅所誅年三十五德稱尊號僞諡幽皇帝

晉書曰始廙以武帝太康六年稱公至暉四世暉在位十一年以海西公太和五年滅通廙號凡八十五年

前秦苻洪

崔鴻十六國春秋前秦錄曰苻洪字廣世略陽臨渭氏人其先有扈氏之苗裔子孫強盛世爲氏酋其後家池生蒲長五丈節如竹形于時咸異之謂之蒲家因以氏焉父懷歸爲部落小帥母姜氏寢產洪先是隴右大雨霖百姓苦之譏曰雨若不止洪水必起故名之曰洪年十二父卒代爲部帥好學多權略嘗騎射屬劉氏之亂散千金招延儔

傑戎晉緹負奔之推爲盟主劉聰遣使拜平遠將軍不受
自稱護氏校尉秦州刺史略陽公羣氏推爲首劉曜以洪
爲氏王及曜敗於洛陽洪率部人西堡隴山石虎將軍攻
上邽洪詣虎降虎跣出迎之拜冠軍將軍監六夷諸軍事
涇陽伯趙建平四年石生起兵於關中洪遂西結張駿自
稱晉北平將軍雍州刺史石虎旣滅生洪率戶二萬下隴
東如馮翊虎拜洪護氏校尉進爵爲侯徙秦雍州民羌十
餘萬戶于關東遷洪龍驤將軍流民都督處之枋頭從征
段遼有功進封西平郡公佛圖澄言苻氏有王氣虎陰欲
殺之洪稱疾不朝太寧元年進位侍中車騎大將軍開府
儀同三司雍州刺史進封本國略陽郡公時姚弋仲亦圖
據關中恐洪先之遣子襄率衆五萬來伐洪洪逆擊敗之
於是安定梁楞等並關西民望說洪曰今胡運已終中原

喪亂明公神武自天必繼蹤周漢宜稱尊號以副四海之
望洪以讖文有草付應王又孫堅之生背有苻字遂改姓
苻氏自稱大將軍大單于三秦王初趙將軍麻秋西鎮抱
音罕聞冉閔之亂率衆歸鄴洪使子龍驤雄逆擊獲之以
爲軍師將軍秋說洪西都長安旣而秋因讎醜洪將併其
衆世子健收而殺之洪將死謂健曰關中周漢舊都形勝
之國吾亡之後便可鼓行而西言終而薨年六十六

苻健

崔鴻十六國春秋前秦錄曰健字建業洪第三子母羌氏
夢感大羆而生生之夜洪夢族曾氏王蒲健謂之曰是兒
興家門可以吾名字之於是名羆字世健後避石虎外祖
張羆之名故改焉晉永和六年自稱晉征西大將軍開府
都督關西諸軍事雍州刺史於是盡衆西行至盟津起浮

橋以濟濟訖焚橋三輔堡壁悉降十一月入都長安於是
左長史賈玄碩等依諸葛亮劉備故事表健爲秦王玄碩
等乃上尊號健僞讓再三乃從之皇始元年正月僭即天
王位于南郊大赦改晉永和七年爲皇始元年追尊父洪
爲太祖武惠皇帝繕宗廟社稷於長安立妻強氏爲皇后
子萇爲皇太子靚爲平原公生爲淮南公弟雄丞相東海
公其餘封授各有差是年野蠶成繭野禾被原百姓採野
繭而衣收野粟而食關西家給人足二年正月丞相雄等
固請宜依漢晉兼皇王之美不可過自謙沖同趙之初號
健從之僭即皇帝位于太極殿大赦諸公進爵爲王立五
等之封以次進之三年正月下書曰其令公卿已下歲舉
賢良方正孝廉清才多略博學秀才異行各一人或獻書
規諫或面陳朕過其速以聞勿拘貴賤四年丞相東海王

雄卒贈相國進封魏王謚敬武王雄字元才洪之季子趙
建武中拜龍驤將軍雄頭大足短故軍中稱爲大頭龍驤
健甚重之曰元才吾之姬且五年四月立淮南王生爲皇
太子六月健寢疾引太師魚尊丞相雷弱兒太傅毛貴司
空王隨等囑以後事受遺輔政乙酉薨于太極前殿年四
十九葬原陵僞謚明皇帝廟號世宗永興初追尊曰景明
皇帝廟號高祖

崔鴻十六國春秋前秦錄曰苻生字長生健第三子幼而
寵暴昏酒無賴祖洪甚惡之生無一目七歲洪戲之問侍
者曰吾聞瞎兒一淚信乎侍者曰然生怒引佩刀自刺出
血曰此亦一淚耶洪大驚鞭之生日生耐刀槩不堪鞭捶
洪曰汝爲爾不已吾將以汝爲奴生日可不如石勒也及

長力舉千鈞走及奔馬皇始五年僭卽皇帝位大赦改年羣臣奏先帝晏駕甫爾不宜改號生怒不從窮推議主壽光元年七月殺右僕射段純以太子門大夫趙韶爲僕射太子舍人趙誨爲中護軍著作佐郎董榮爲尙書竝以佞倖進也九月中書監胡文言於生日比頻有客星孛于大角熒惑入東井大角爲帝坐東井秦之分野不出三年國有大喪大臣戮死願陛下遠追周文脩德以攘之生日皇后與朕對臨天下足塞大喪之變於是殺皇后梁氏誅太傅錄尙書毛貴車騎尙書令梁楞左僕射梁安后安之女孫又誅丞相雷弱兒諸羌悉叛弱兒南安羌酋也生雖諒闇遊飲荒淫殺戮無道彎弓露刃以見朝臣錘鉗鋸鑿備置左右未幾后妃公卿已下至于僕隸誅五百餘人二年正月嬖臣右僕射董榮言於生日日蝕之灾宜以貴臣應

之生日唯有大司馬國之懿戚不可其在王司空生從之誅司空王隨壬戌饗羣臣于太極殿樂奏生親歌以和之命尙書令辛牢典勸生怒曰何不強酒猶有坐者引弓矢射牢殺之於是百僚大懼無不引滿昏醉汚服蓬頭僵仆生以爲樂三年四月姚襄遣姚蘭等衆二萬七千進據黃洛生遣平王黃眉東海王堅建節將軍鄧羌等步騎萬五千以討之羌僞不勝引騎而退襄追之至於三原羌迴騎拒襄大戰獲襄襄有駿馬日行千里是戰也馬倒而擒之黃眉等振旅而歸初長安謠曰東海大魚化爲龍男便爲王女爲公問在何所洛門東東海卽堅封也第在洛門東生荒暴日滋殘虐彌甚羣臣朔望漏盡請見生日日盡乎須待飲訖或日暮而不出百僚飢弊或至申酉之間方出臨朝輒怒色厲多有殺戮或連月昏醉弗堪省覽或使宮

人與男子輟交於殿前引羣臣臨而觀之或生剥牛羊驢馬爛雞鴨三五千為羣放之殿中或生剥死囚面皮令其歌舞觀以為樂勳戚忠良殺害略盡朝士奔逃草野皆曰從虎口出左右得度一日如過十年至於截脛刳胎拉腸鋸頭殺者動有千數生夜對待婢曰阿法兄弟亦不可信明當除之是夜清河王苻法夢神告之且將禍集汝門先覺可以免寤而心悸會侍婢來告乃與特進梁平老等帥壯士數百人僭入雲龍門東海王堅帥麾下三百人繼進宿衛將士皆捨仗歸堅生猶昏寢不悟堅眾既至生驚問左右曰此輩何等入引生置別室廢為越王俄而殺之時年二十三諡厲王封子熿為越侯

太平御覽卷第一百二十一

太平御覽卷第一百二十一

偏霸部六

前秦苻堅

苻丕

苻登

苻堅

崔鴻十六國春秋前秦錄曰苻堅字永固健弟雄之子趙建武中母苟氏祈西門豹祠歸而夜夢與神交遂孕十二月而生有神光之異自天屬庭背有赤文隱起成字曰艸音付臣又土王咸陽祕而莫之傳也姿貌魁傑臂垂過膝目有紫光祖洪奇而愛之名堅頭因而謂健曰此兒頭大重身長任大足短安下非常相趙右光祿大夫司隸校尉高平徐統有知人之鑒遇堅於路異之執其手曰苻郎此官之御街小兒敢戲統願左右曰此兒有霸王之相後復遇之統下車謂曰苻郎當大貴僕不及見如何堅曰若如

公言不敢忘德入歲請就師學洪曰尚小未可吾年十三方欲求師時人猶以爲速成健之入關次于曲沃夢天神遣使者朱衣赤冠命拜堅爲龍驤將軍且而爲壇於曲沃拜堅泣謂堅曰先王昔始受此號汝父次爲之今若若汝復爲神明所授可不勉之性至孝有器度博學多才藝年十一便有經略大志堅旣殺苻生永興元年六月去皇帝之號僭稱大秦天王卽位太極殿誅董龍等二十餘人改壽光三年爲永興元年追尊父爲文桓皇帝世子宏爲皇太子兄清河王法爲丞相東海公以永安公苻侯爲太尉諸王皆貶爵爲公苻柳爲尚書令封弟融爲陽平公雙河南公子丕爲長樂公暉爲平原公熙爲廣平公李威爲左僕射梁平老爲右僕射席寶爲丞相長史王猛爲中書令侍郎權翼爲黃門郎諸公卿爲生所誅者悉復本官十月

丞相東海公法以疑忌賜死苟太后之意也堅性友愛與法訣於東堂慟哭嘔血二年四月堅如雍祀五時音六月如河東祀后土八月自臨晉登龍門顧謂群臣曰美哉山河之固權翼對曰吳起有言在德不在險深願陛下追蹤唐虞懷遠以德山河之固不足恃也堅大悅至韓原觀晉魏顛鬼結草抗秦軍之處賦詩而歸甘露元年正月起明堂禪音南北郊六月甘露降乃大赦改年八月堅下書曰咸陽內史猛聲彰出納所在著績有卧龍之才宜入贊百揆絲綸王言可徵拜侍中中書令領京兆尹中丞鄧羌性鯁直與猛協規齊志於是百僚肅整豪右屏氣風化大行堅歎曰吾今始知天下之有法也以猛爲吏部尚書遷太子詹事十一月以猛爲司隸侍中領選如故猛上疏曰伏見陽平公融明德懿親光祿西河任群忠貞淑慎處士朱

形博識聰辨竝宜左右彌綸暉贊九棘愚臣庸鄙請避賢
路堅曰機務俟才允屬明哲朝野所望豈容致辭所舉融
等尋別銓授於是融爲侍中中書監右僕射任翀爲光
祿大夫領太子家令朱彤爲中書侍郎領太子庶子三年
九月鳳皇集于東閣大赦境內初將爲赦與左僕射猛右
僕射融議於露堂悉屏左右堅自爲赦文猛融進紙筆有
一大蒼蠅入自牖間鳴聲甚大集于筆端驅而復來堅惡
之久而乃去俄而長安街巷市里民相告曰官今大赦有
司以聞堅驚謂融曰事何從而泄勅外窮推之咸言有一
小人衣黑衣呼於市曰官今大赦須臾不見堅歎曰其向
蒼蠅乎聲狀非常吾固惡之四年七月黃龍見於成紀梁
山崩五年白虎見天水六年遣鴻臚拜張天錫爲大將軍
涼州牧西平公建元元年正月雍州秀才段鏗對策上第

拜吏部郎中孝廉通經者十餘人皆拜令長五年六月晉
大司馬栢溫伐燕次于枋音方頭燕師屢敗遣散騎侍郎樂
嵩來乞師請賂秦以虎牢以西之地八月遣將軍苟池洛
州刺史鄧羌帥步騎二萬救燕溫敗歸是月京兆民王攸
上書獻十略一曰君道宜明二曰臣尚忠敬三曰子貴孝
養四曰民生在勤五曰教無偏黨六曰養民在惠七曰延
聘耆賢八曰懲惡顯善九曰伐叛柔服十曰易簡弘大堅
納之以攸爲諫議大夫十一月燕車騎吳王垂來奔栢溫
旣走慕容暉音韋悔割河洛之地以賂秦乃曰行人失辭分
災救患理之常也堅大怒六年令輔國王猛帥鎮南楊安
虎牙將軍張蚝音欠建節鄧羌等步騎六萬討平燕翼八月
猛攻尅壺關障遣太傅上庸王評等帥四十萬屯於潞川
猛覘丑豔切規規候也知評賣水鬻樵不撫將士大笑謂楊安等曰

慕容評真奴才雖億兆之衆尚不足爲慮況數十萬乎今破之必矣甲戌陳於渭原猛誓衆曰王景略受國厚恩任兼內外今與諸君深入賊地宜各勉進不可退也受爵明君之朝慶觴父母之室不亦美乎衆皆勇奮破釜棄糧大呼聲進猛望燕師之衆惡之謂鄧羌曰今日之事非將軍莫可以捷也成敗之機在斯一舉羌曰若以司隸見與公無以爲憂猛曰此非吾所及必以安定大守萬戶侯相颺羌不悅而退俄而兵交猛召羌寢而不應猛乃馳就許之羌於是飲與張蚝徐成等跨馬馳入傍若無人舉音愆輦也旗斬將燕師敗績進師圍鄴猛之未至鄴也劫盜公行及猛之至遠近帖然十一月堅自帥精銳十萬攻鄴七日而至於安陽故宅引諸耆老語及祖父舊事泣然流涕猛潛如安陽迎堅堅謂曰昔亞夫不出軍迎漢文將軍何

以臨敵而背衆乎猛曰臣每覽亞夫之事常謂前却人主以此而爲名將竊未多之臣奉陛下神竿擊垂亡之虜若摧枯拉音朽何足憂也戊寅尅鄴慕容暉出奔將軍郭慶執擘於高陽送之辛巳堅入鄴宮大赦閱其圖籍郡百五十七縣一千五百七十九戶二百四十五萬八千九百六十九以王猛爲都督諸軍事車騎大將軍開府儀同異州牧鎮鄴封清河郡侯以僞太宰恪太傅評之第盡賜之加美妾五人上女妓十人中女妓三十八人猛辭堅曰昔魏絳和戎猶有金石絲竹之賞山甫翼周實受四牡之錫卿功超二子任過管葛安得辭也其敬受之無逆朕命以鄧羌爲散騎常侍安定太守真定郡侯邑三千戶賞潞川之功七年七月堅如洛陽下書曰士死知己猶來格模故喬公一言魏祖追慟趙司隸高平徐統往在鄴都識朕於童

稚每思其殷勤之言弗敢忘也可召其子孫詣行所八年五月以高平徐攀爲琅邪太守攀統之少子以舊恩拔之也六月冀州牧猛入爲丞相中書監司隸校尉猛固辭丞相改授司徒又固辭不拜乃停司徒之授四月天鼓鳴彗出于尾箕長十餘丈或名蚩尤旗太史令張猛言於堅曰尾燕之分野而掃東井東井秦之分災深禍大十年之後燕滅秦之象二十年之後燕當爲岱所滅慕容暉父子兄弟亡虜也而布列朝廷貴盛莫二宜除渠帥以寧皇秦若且誅鮮卑不夕滅客孽者臣請就妖言之戮堅不納更以暉爲尙書垂爲京兆尹冲爲平陽太守十年三月侍中大尉李威卒威字伯龍漢陽人苟太后姑子少與苻雄結刎頸之交苻生屢欲誅堅賴威之免堅深德之事威如父誅苻生及法皆威與太后潛決大謀遂有辟陽之寵雅重王

猛勸堅以國事任之堅常謂猛曰李公知卿猶鮑叔之於夷吾罕虎之於子產猛兄事之夏四月堅下書曰巴夷嶮逆寇亂益州招引吳軍爲唇齒之勢特進鎮軍將軍護羌校尉鄧羌可帥甲士五萬星言赴討五月蜀人張育楊光等起兵二萬以應巴獠音老晉威遠將軍栢石虔帥衆二萬入據墊音唐江張育自號蜀王稱蕃于晉八月鄧羌敗晉師于涪音浮西擊張育楊光於綿竹皆斬之益州平羌勒銘于岷山而還十二月羌至自成都堅引見東堂謂之曰將軍之先仲華遇漢世祖於前將軍復逢朕於後何鄧氏之多幸羌曰臣常謂光武之遇仲華非獨仲華之遭光武堅笑曰將軍蓋以自貶非直將軍之幸亦朕之遇賢十一年正月以徵士樂陵王忻爲國子祭酒堅雅好文學英儒畢集純博之精莫如忻也終于太子少傅五月猛寢疾堅親祈

南北郊宗廟社稷分遣侍臣禱河岳諸神無不周備以猛少瘳赦殊死七月堅臨省疾問以後事猛曰晉僻陋吳越乃正朔相承臣沒之後願不以晉爲圖鮮卑羌虜我之仇讎終爲大患宜漸除之以便社稷言終而卒時年五十一堅哭之慟謂太子宏曰天不欲使吾平一六合何奪吾景略之速也贈侍中丞相餘如故謚武侯朝野巷哭三日十二年正月癸巳高陸民穿井得龜大三尺六寸背有八卦文命太卜池養之食之以粟四月堅下書曰涼州刺史張天錫雖稱蕃受位而臣道未純可步兵校尉姚萇等自石城津伐天錫率勁勇五萬來拒戰于赤岸涼師大潰天錫率騎數千奔還姑臧降于萇甲午大軍至姑臧天錫素車白馬面縛舁櫬降于軍門萇釋縛焚櫬送之長安諸郡悉降涼州平九月以梁熙爲西中郎將涼州刺史鎮姑臧

徙豪右七千戶於關中封天錫重光縣之東寧鄉二百戶號歸義侯拜比部尚書遷右僕射萇之征也堅爲天錫立第旣至如歸十三年正月太史奏有星見于外國之分當有聖人之輔中國得之者昌堅聞西域有鳩摩羅什襄陽有釋道安竝遣求之十七年正月不雨至于六月徹樂減膳出宮女以迎和氣八月堅收起居注及著作所錄而觀之見荀太后李威之事慙怒乃焚其書著作郎薰臚音雖更書時事然十不留一十八年三月徙鄴銅駝銅馬飛廉翁仲于長安十月堅引羣臣於太極殿議曰東南一隅未賓王化今欲起天下兵討之計其兵仗精卒九十七萬吾將先啓行薄伐南裔此行也朕與陽平公之任非諸將之事左右僕射權翼沙門道安陽平公融尚書石越等上書面諫前後數十堅終不納十九年晉車騎相沖率衆十萬

攻襄陽遣其前將軍劉波攻沔北堅大怒遣其子征南鉅鹿公叡冠軍慕容垂佐衛毛當等將步卒五萬救襄陽堅下書曰吳人敢恃江山屢寇王境宜時進討以清宇內便可戒嚴速脩戎備發州民則十丁遣一兵若門在灼然者爲崇文義從朕將登會稽復禹績伐國存君義同三王其以司馬昌明爲左僕射謝安爲吏部尚書桓沖爲侍郎勢還不遠可並爲起第八月戊午遣征南大將軍陽平公融騎從張蚝撫軍大將軍高陽公苻方衛軍梁成平南慕容暉冠軍慕容垂步騎二十五萬爲前鋒甲子堅發長安戎卒六十餘萬騎二十七萬前後千里九月堅至項城涼州之兵始達咸陽蜀漢之軍順流而下幽冀之衆至于彭城東西萬里水陸齊進融等攻壽春晉遣都督謝石徐州刺史謝玄豫州刺史桓伊水陸七萬敗堅于淝水堅爲流矢

所中單騎遁還於淮北顧謂夫人張氏曰朕用朝臣之言豈見今日之事耶何面目復臨天下泣然流涕堅諸軍悉潰惟慕容垂一軍獨全比至洛陽百官威儀軍容粗備未及關而垂有貳志說堅請巡撫燕代并求拜墓堅許之權翼固諫以爲不可堅不從堅至自淮南次于長安東之行宮入告罪于太廟丁零翟斌反于河南長樂公苻丕遣慕容垂及苻飛龍討之垂南結丁零殺飛龍盡坑其衆垂引丁零烏丸之衆二十餘萬爲飛梯地道以攻鄴城慕容暉弟泓先爲北城長史聞垂攻鄴亡奔關東收諸馬牧鮮卑衆至數千還屯華陰暉乃潛使諸弟及宗人起兵于外堅遣將軍強永擊之爲泓所敗泓自稱大都督雍州牧濟北王推叔父垂爲丞相大司馬冀州牧吳王堅謂權翼曰將若泓何翼曰慕容垂正可據山東爲亂不暇近逼今暉宗

族盡在京師鮮卑之衆布在畿甸實社稷之憂宜遣重將討之堅乃以廣平公苻熙鎮蒲坂苻叡爲都督配兵五萬姚萇爲司馬討泓于華陽平原太守慕容冲起兵河東有衆二萬進攻蒲堅命竇衝討之苻叡勇果輕敵戰于華陰叡敗績被殺堅大怒萇懼誅遂叛竇衝大破慕容冲于河東冲奔于泓泓衆至十萬餘遣使謂堅曰秦師傾敗將欲興復大燕吳王以定關東可速資備大駕奉送家兄皇帝返鄴都與秦以虎牢爲界分王天下堅大怒召暉責之暉叩頭流血陳謝堅曰此自三堅之罪非卿之過復其位待之如初命暉以書招諭冲及泓冲使息兵暉密遣使謂之曰今秦數已終當不能復久吾籠中之人必無還理勉建大業以興復爲務泓於是進向長安堅率步騎二萬討姚萇於北地萇率衆七萬來攻堅爲萇所敗聞慕容冲去長

二百餘里退師而歸使苻方戍驪山苻暉都督中外諸軍事配兵五萬拒冲暉師敗績堅又以尙書姜宇與苻琳率衆三萬擊冲于霸上爲冲所敗宇死之琳中流矢冲遂據阿房城進逼長安堅登城觀之歎曰此虜從何出也吾不用王景略陽平公之言使白虜敢以至於此長樂公苻丕在鄴糧竭馬又無草削松木而食之會丁零叛慕容垂引師去鄴始具西問知長安危逼遣從弟求救於謝玄二十一年慕容冲僭稱尊號于阿房改年更始冲率衆登城堅身貫甲冑督戰拒之飛矢滿身流血被體時雖兵寇危逼馮翊諸堡猶有負糧冒難而至者多爲賊所殺先是謠言堅信之留太子宏守長安謂之曰脫如謠言天或導余留汝兼總戎政勿與爭利吾當出隴收兵運糧以給汝自將張夫人及中山公詵率騎數百出如五將山六月太子宏

將母妻數千騎出奔沖入據長安堅至五將山姚萇遣將軍吳忠圍之堅眾奔散獨侍御十數人而已神色自若召宰人進食俄而忠執堅以歸新平縣幽之別室萇求傳國璽於堅曰萇次應符曆可以為惠堅叱之曰小羌乃敢干逼天子豈以傳國璽授汝羌乎五胡次序無汝羌名違天不祥其能久乎璽已送晉不可得也萇遣右僕射尹偉說堅求為堯舜禪代之事堅曰姚萇叛賊奈何擬之古人因問偉曰卿於朕朝作何官對曰尚書令史堅歎曰卿宰相才也王景略之流而朕不知卿亡也不亦宜乎八月縊堅於新平佛寺中時年四十八張夫人中山詵等皆自殺三軍莫不哀慟萇欲匿煞堅之名乃謚為莊烈天王長樂公稱尊號偽諡堅為世祖宣昭皇帝初太子之奔也假道歸晉歷位輔國將軍桓玄篡位以為梁州刺史晉書曰堅在

晉書曰堅在位二十七年

苻丕

崔鴻十六國春秋前秦錄曰苻丕字永敘堅之長庶子少而聰惠好學堅與之言將略嘉之才幹亞于苻融為將善收士卒時出鎮于鄴東夏安之堅敗歸長安為慕容垂所逼自鄴奔于枋頭堅之死也建元二十一年丕復入鄴城將收兵趙魏西赴長安會平州刺史苻沖帥幽并之眾擊慕容垂頻為垂將帶方等所敗乃率眾三萬進屯壺關使招丕丕乃去鄴率男女六萬進如潞川驃騎將軍張蚝并州刺史王騰迎之入據晉陽始知長安不守堅為姚萇所煞乃舉哀于晉陽僭即皇帝位于晉陽南立堅行廟大赦改建元三十一年為太平元年九月置百官是月安西呂光自西域還師二年正月慕容垂僭稱尊號二月慕容沖

左將軍韓延煞冲立段隨爲燕王改年昌平正月丕以呂光爲車騎將軍梁州牧酒泉公是月姚萇僭稱尊號氏有啖青者謂諸將曰狄道長苻登雖王室疎屬而志略雄明請共立之以赴大駕於是推登爲使持節督隴右雍州二州牧率衆五萬東下隴右據南安馳使請命八月丕以登爲征南大將軍開府儀同南安王持節雍州牧因其所稱而授之九月丕下書鮮卑慕容永我之騎將首亂京畿禍傾社稷其遣丞相王永帥禁衛虎旅覆而取之十月與慕容永戰于襄陵王師大敗丕懼帥騎數千南奔東垣晉揚威將軍馮該自陝要擊斬之送丕首于江東苻登稱尊號謚爲哀平皇帝

苻登

崔鴻十六國春秋前秦錄曰苻登字文高丕之族子父敞

太尉司馬登少勇有壯氣建元元年初拜殿中將遷羽林監長安令坐事黜爲狄道長太平二年與姚萇戰於胡奴坂大破之十一月丕子渤海王懿自吉城奔登登乃具丕死問於是爲丕發喪行服爲壇于隴東僭卽皇帝位改太平二年爲太初元年十二月立堅神主于軍中引師而告堅神主曰今收合義旅衆餘五萬星言電邁直造賊庭庶上報皇帝酷怨下雪民人大恥二年登次于瓦亭九月進據胡空堡戎夏歸之者十有餘萬姚萇掘堅屍鞭撻無數裸剥衣裳附之以棘坎土埋之三年登次朝那姚萇據武都相持累戰互有勝負萇以登戰勝謂堅神像所助亦於軍中立堅神主謂曰往年新平之禍非萇之罪陛下假臣龍驤日朕以龍驤建業卿其勉之明詔昭然言猶在耳豈假手苻登而圖臣忘前征時言耶今爲陛下立神像可歸

休于此勿計臣過聽臣至誠四年正月登昇樓謂萇曰自古安有殺君反立神像大呼曰殺君賊姚萇出來與汝決之何爲枉害無辜萇憚而不應萇自立堅神像戰未有利軍每夜驚乃斬像首送登六年三月登自雍攻長安七月登攻新安姚萇救之登引退八年十二月姚萇薨九年登聞萇死喜曰姚興小兒吾折杖以笞之於是大赦盡衆而東四月登從六陌趣廢橋興將軍尹緯據橋以待登爲緯所敗登單馬奔雍初登之東也留太子崇守胡空堡崇聞登敗奔城出奔登至無歸乃奔平涼集遺兵入馬毛山七月興攻登于馬毛登遣子崇質於隴西鮮卑乞伏乾歸結婚請援乾歸遣騎二萬救登登引軍出迎與興戰于山南爲興所敗死之時年五十二子崇奔隍中復稱尊號改年延初謚登爲高皇帝十月崇爲乾歸所逐奔于楊定與崇

帥衆二萬攻乾歸爲乾歸所敗崇定皆死之自苻健皇始元年歲在辛亥晉永和七年是歲歲在甲午四十四年晉太元十九年也

晉書曰登在位九年始健以穆帝永和七年僭立至登在位世凡四十有四年以孝武帝太元十九年滅

太平御覽卷第一百二十二

扶風公劉曜以弋仲爲平西將軍石虎廢石弘自立仲稱疾不賀虎累召之乃赴太寧元年拜侍中征西大將軍石祗稱尊號於襄國以仲爲右丞相石祗爲劉顯所殺仲乃與燕連和仲有子四十二人誠諸子曰我死之後汝歸晉家竭盡臣節乃使使降晉晉永和七年拜仲使持節六夷大都督江北諸軍事儀同三司大單于封高陵郡公八年薨年七十三後仲屍柩爲苻生所得生以王禮葬之於天水其稱尊號追謚景元皇帝廟號始祖陵曰高陵

姚襄

崔鴻十六國春秋後秦錄曰姚襄字景國仲第五子雄武多才藝能明察善撫納士民愛敬之咸請爲嗣仲以襄非長不許石祗僭號以襄爲使持節驃騎將軍護烏丸校尉晉遣使拜襄持節平北將軍并州刺史即丘縣公弋仲薨

率戶六萬南至滎陽晉虓襄于譙城遣弟爲任單騎渡淮見豫州刺史謝尚一面交款便若平生楊州刺史殷浩憚其威名遣謝萬討襄逆擊破之鼓行濟淮屯于盱眙上音呼下音怡朝廷大震襄方軌引北自稱大將軍大單于據許昌自許遂攻洛陽踰月不尅晉征西大將軍桓溫自江陵伐襄溫至伊水襄徹圍拒之爲溫所敗襄奔還洛陽率數千騎奔于北山百姓隨襄者四千餘戶襄尋從北山將圖關中進屯杏城遣輔國將軍姚蘭略地鄜城苻生遣苻飛拒戰襄率衆西引與苻堅戰于三原爲堅所殺時年二十七其稱尊號追謚魏武王

姚萇

崔鴻十六國春秋後秦錄曰姚萇字景茂仲之第二十四子少聰哲多權略不脩行業兄襄爲苻堅所殺萇率諸弟

降秦苻堅以爲楊武將軍步兵校尉潞川之戰有殊功遷左衛將軍累授幽州刺史苻堅伐晉以萇爲龍驤將軍督益梁二州諸軍事謂曰朕本以龍驤建業龍驤之號未曾假人特以相授山南之事一以委卿左將軍竇衝進曰王者無戲言此不祥之徵也堅默然白雀元年慕容泓起兵堅遣子叡討之以萇爲叡司馬旣而爲泓所敗叡死萇遣參軍姜協謝罪堅怒殺之萇懼奔于渭北歸者五萬餘家咸推萇爲盟主自稱大將軍大單于萬年秦王大赦改元稱制行事二年六月慕容冲入長安司隸崔翼尚書趙遷等數百人來奔萇聞苻堅在五將山遣驍騎吳忠率騎圍之萇自故縣如新平吳忠執堅送之萇將求禪代堅不許慕容冲遣車騎大將軍尚書令高蓋來戰于新平大破之蓋率麾下數千人來降建初元年僭即皇帝位于長安大

赦改年國號大秦改長安爲常安追尊考仲景元皇帝妣曰德皇后子興爲皇太子秋七月萇如安定二年徙秦州三萬戶于安定七月以太子興鎮長安四年十月立社稷于長安六年大敗苻登于長安七年三月萇寢疾遣鎮東姚碩德守長安召太子興詣行在所八年十月萇如長安至于新支堡疾篤興疾而進十二月至長安召大尉姚旻僕射尹緯等受遺詔輔政萇曰吾氣力轉微將不能復臨天下卿等善相吾子謂興曰有毀此諸人者慎勿受之汝撫骨肉以仁接大臣以禮待物以信遇民以恩四者旣備吾無恨矣庚子薨于永安宮年六十四謚武昭皇帝葬元陵廟號太祖

姚興

崔鴻十六國春秋後秦錄曰姚興字子略萇之太子萇薨

秘不發喪皇初元年乃發喪行服卽位于槐里大赦改元七月如涇陽與苻登戰徙陰密三萬戶於長安二年以叔父緒爲晉王征西將軍碩德爲隴西王弟崇爲齊公顯爲常山公三年以緒爲并翼二州牧鎮蒲坂四年二月遣齊公崇伐洛陽弘始元年九月大赦改元冬十月尅洛陽以東平公紹爲都督山東諸軍事豫州牧鎮洛陽四年五月遣大將軍隴西王碩德率步騎六萬伐呂隆於涼州先是吐蕃傳內沃切擅據西平沮渠蒙遜據張掖李暠據燉音煌屯各制方域共相侵伐碩德從金城濟河直趣廣武逕蒼松至隆城下隆遣弟輔國超龍驤邈等率衆拒碩德碩德大破之生擒邈傳擅蒙遜李暠等各脩表奉獻九月隆奉表請降興答報嘉美以隆爲鎮西將軍涼州刺史建康公十一月鳩摩羅什至長安七年正月興如逍遙園引諸沙門

聽什說佛經九年以太子泓錄尚書事燕王慕容超遣使稱藩十年與魏通和貢馬千疋十一年蜀譙縱遣使稱藩十六年五月興疾于內寢太子泓以兵屯東華門侍疾于諮議堂尚書令廣平公弼如弼也潛謀爲亂招集數千人持兵於第興疾損升前殿百官咸會征虜劉羗泣曰陛下寢疾數旬柰何忽有斯事興曰朕過庭無訓諸子交惡含聽胡顏愧于四海興以弼文武兼才未忍致法免其尚書令以公就第十七年十二月興疾重廣平公弼告病不朝集兵於第興怒乃收弼囚之十二月興疾甚遣收廣平公弼第甲仗還武庫於是弼黨率甲仗攻端門殿中上將軍斂曼高一作曼高勒兵拒戰不得入遂燒端門興力疾臨前殿賜弼死丁未薨於前殿年五十三謚文桓皇帝廟號高祖墓曰偶陵

姚泓

崔鴻十六國春秋後秦錄曰姚泓字元子興之太子與薨
 卽位大赦改元爲永和元年廬于諮議堂訖葬乃親庶政
 晉相劉裕來伐遣冠軍檀道濟龍驤王鎮惡入自淮肥二
 年七月劉裕次于陝城泓次于灊上裕至潼關泓自灊上
 還軍次于石橋裕進據鄭城泓遣姚裕屯兵官中將軍姚
 丕守渭橋泓軍于逍遙園丕爲晉所敗泓自赴之因丕之
 敗遂相踐而退泓與河間公裕等數百騎出奔于石橋大
 將軍東平公讚聞泓之敗率諸軍赴難會泓于石橋晉人
 已固青門一云諸門讚軍不得入衆皆驚散泓與河間公裕等
 詣裕請降泓于彭城公伏念年十二謂泓曰陛下今雖降
 晉劉裕待人無禮終必不全願自裁決泓慙音武又音然
姚失意也
 不荅念遂登宮牆自投而死平原公璞并州刺史尹昭以

蒲坂降晉東平公讚率宗室子弟百餘人亦降于裕裕盡
 殺之九月裕至長安送泓于建康市戮之時年三十建康
 百里之內草木燹死自姚萇白雀元年歲在甲申至于是
 歲歲在丙辰三十有三歲

蜀李特

崔鴻十六國春秋蜀錄曰李特字玄休巴西宕渠人其先
 稟君之苗裔秦併天下以爲黔中郡薄賦其人口歲出錢
 四十巴人謂賦爲寶臧宗遂因名焉及高祖爲漢王始募
 寶民平定三秦旣而不願出關求還鄉里高祖以其功復
 同豐沛更名其地爲巴郡土有鹽漆之利民用殷阜俗性
 剽勇又善歌舞高祖愛其舞詔樂府習之今巴渝舞是也
 其後繁昌分爲數十姓及魏武尅漢中特祖父虎歸魏魏
 武嘉之遷略一云洛陽陽拜虎等爲將軍內徙者亦萬餘家散

居隴右諸郡及三輔弘農所在號爲巴人虎子慕爲東羌
獵將慕凡有五子輔特庠流驤特身長八尺雄武善騎射
沉毅有大度元康中氐齊萬年擾亂天水略陽扶風始平
諸郡皆被兵寇民頻歲大飢流移就穀相與入漢川者數
萬家特至劔閣顧盼嶮阻曰劉禪有如此地而面縛於人
豈非庸才耶同移者閩或音郁等咸歎異之初流民旣至漢
中上書求寄食巴蜀朝廷從之由是散在梁益不可禁止
元康九年詔徵益州刺史趙廞音歆爲大長秋以成都內史
耿勝代廞廞遂謀叛有劉氏割據之志勝率衆入州廞遣
衆逆之戰于西門勝敗走廞獲煞之廞自稱大將軍益州
牧時李庠與兄弟及李含任回等以四千騎歸廞廞以庠
爲威寇將軍使斷北道庠素東羌良將曉兵陣兵部肅然
歛惡其齊整煞之復以特爲督將特兄弟旣怨廞引兵歸

綿竹廞恐朝廷討己遣長史費遠音虔爲太守李苾音切
督萬餘人斷北道次綿竹之石亭特密收合得七千餘人
夜襲遠軍遠軍大潰因放火燒之死者十八九進攻成都
廞聞兵至驚懼不知所爲李苾等夜斬關走出文武盡散
廞獨與妻子乘小船走至廣都爲其下人朱竺所煞先是
梁州刺史羅尚聞廞叛上表稱廞非雄才又蜀人不願爲
亂事終無成願欲征之惠帝遣尚爲平西將軍益州刺史
率七千餘人入蜀特等聞尚來甚懼使弟驤於道奉迎并
貢寶物尚甚悅冬十月六郡流人推特行鎮北將軍承制
封拜其弟流行鎮東將軍弟驤驍騎將軍少子雄爲前將
軍以相統領進兵攻尚於成都頻爲特所敗乃阻長圍緣
水作營自都安至犍爲七百里與特相距大安二年部下
推特爲大將軍大赦改元爲建初元年益州從事任明說

尚曰特既兇逆侵暴百姓又分人散衆在諸村堡驕怠無備是天亡之時也可告諸村密尅期日內外擊之破之必矣尚從之遣大衆奄襲特營尙出逆戰到官桑特軍敗績死之雄稱成都王追謚景王及稱尊號追尊曰景皇帝廟號始祖

李流

崔鴻十六國春秋蜀錄曰李流字玄通特第四弟也少好學便弓馬東羌校尉何攀稱流有賁音奔育之勇舉爲東羌校尉平趙廞於成都晉朝論功拜奮威將軍封武陽侯建初元年特既見殺流自稱大將軍益州牧九月流疾篤謂諸將曰驍騎李驥高明仁愛識量多奇固足以濟大事然前軍李雄英武殆天所相可共受事於前軍以爲成都王也遂薨年五十六諸將共立雄爲主雄稱尊號追謚流秦

文王子龍嗣

李雄

崔鴻十六國春秋蜀錄曰李雄字仲儁特第三子母羅氏夢雙虹自門昇天一虹中斷旣而生蕩後羅氏汲水忽然而寢夢大虹繞其身遂有孕十四月而生雄常言二子若有先亡在者必大貴蕩以李流世卒雄長八尺三寸美容貌相工相之曰此君將貴其相有四目如重雲鼻如龜龍口方如器耳如相望法爲貴人位過三公不疑雄少以烈氣聞識者皆器重之特稱益州牧以雄鎮梓潼又拜前將軍流薨雄稱大將軍益州牧治郫音岐城以西山范長生巖居穴處求遵養之志雄欲迎立爲君長生固辭曰推步太元五行大會甲子祚鍾於李非吾節也建興元年十月雄卽成都王位於南郊大赦改元約法七章以叔父驥爲大

傅兄虎威爲太保晏平元年三月范長生乘素輿詣城雄
迎于大門執版延坐長生請雄對坐卽拜丞相尊曰范賢
長生勸雄稱尊號夏六月僭卽帝位大赦改年國號大成
追尊父特爲景帝母羅氏爲皇太后十月加丞相范長生
天地太師之號封西山侯玉衡五年正月立妻任氏爲皇
后八年四月范長生卒以其子侍中賁爲丞相長生善天
文有術數民奉之如神十四年立兄子班爲太子二十四
年五月雄寢疾六月丁卯薨年六十一謚武皇帝廟號太
宗十月葬安都陵太子班襲位

李期

崔鴻十六國春秋蜀錄曰李期字世運雄第四子聰惠好
學弱冠能屬文雄薨班卽位雄子車騎將軍越自江陽奔
喪以期與班非班所生而嗣位心不平十月因夜哭臨越

煞班於殯宮班字世文雄兄蕩第四子雄妻任氏無子養
班爲子越旣煞班於是矯太后令罪狀謚戾太子立期爲
主甲子期僭卽皇帝位玉衡元年正月大赦改年立妻閻
氏爲后四月大將軍漢王壽率步騎一萬自陪音向成都
期不虞至預不設備至卽尅城屯兵宮門殺相國建寧王
越尙書令景騫尙書田襄等廢期爲邛都公幽之別宮期
自殺年二十五謚曰幽公

李壽

崔鴻十六國春秋蜀錄曰李壽字武考特季弟驤之子少
尚禮容敏而好學雄奇其才秀以足倚重任封爲建寧王
旣而期立改封漢王領梁州刺史治涪城壽見期兄弟十
餘人竝有強兵懼不自全陰謀據成都稱藩於晉乃誓文
武得數千人襲成都尅之放兵虜掠數日乃定於是僭卽

皇帝位於南郊大赦改咸康四年爲漢興元年追尊父驤
獻皇帝三年六月壽下書曰吳會遺燼久逋天誅今將太
興百萬躬行天罰九月大閱軍士七萬餘人舟師泝江而
上過成都鼓譟盈江壽登城觀之群臣以國小衆寡吳會
險遠圖之未易叩頭泣諫乃止兵人咸呼萬歲十月醮禮
於太學舉明經者封好學侯四年以太子勢領大將軍錄
尚書事六年分寧州興古永昌雲南朱提越巂音髓河陽六
郡爲漢州四月壽寢疾常見李期爲崇八月薨年四十謚
昭文皇帝廟號中宗葬安昌陵

李勢

崔鴻十六國春秋蜀錄曰李勢字子仁壽之長子身長七
尺九寸脣帶十四圍善於俯仰時人異之壽旣薨僭即帝
位大赦改太和元年正月尊母閻氏爲皇太后妻李氏爲

皇后嘉寧二年晉遣安西將軍荊州刺史桓溫來伐勢大
發軍禦之鎮東李位都逆往降溫達成都之十里陌勢衆
自潰三月溫至城下縱火燒其大城諸門勢衆惶懼無復
固志勢乃夜開東門走九百里至晉壽然後送降文於溫
勢尋輿櫬面縛軍門溫解縛焚櫬送勢及叔父福戴記云及第福
等十餘人於建康晉封爲歸義侯升平五年卒常璩字道
將蜀成都人少好學著華陽國志十篇序開闢以來迄于
李勢皆有條理云宕渠古寶國今有寶城秦始皇時有長
人長五丈見宕渠秦史胡毋敬曰五百年外其地必有異
人爲大人者及雄之稱尊號祖先出自宕渠有識者皆以
爲應之譙周云我死後三十年當有異人入蜀又著識云
廣漢城北有大賊曰流曰特攻難得歲在玄宮自相尅又
惠帝之世蜀童謠曰江橋頭闕下市成都北門十八字至

是而應焉李特以晉永寧元年歲在辛酉起兵至勢嘉寧
 二年晉永和三年歲在壬戌而降晉合四十七年
 人與大人晉文公之傳武備自晉梁武帝時
 大興正史良皆梁武帝時也曰正史平代其賦必
 李特晉書謝靈運云梁古寶圖今在黃縣秦皇御
 太平御覽卷第一百二十三
 皇永嘉寧二年晉永和三年歲在壬戌而降晉合四十七年

太平御覽卷第一百二十四

偏霸部八

前涼張軌

張寔

張茂

張駿

張重華

張祚

張玄靖

張天錫

西涼李暠

李歆

北涼沮渠蒙遜

沮渠茂虔

前涼張軌

崔鴻十六國春秋前涼錄曰張軌字士彥安定烏氏人漢
 常山王耳十七世孫祖烈魏外黃令父温太官令母隴西
 辛氏軌少好學明經與同郡皇甫士安友善拜太子舍人
 與京兆杜預以所注易遺之太康中爲尚書郎太子洗馬
 中庶子遷散騎常侍征西軍司馬軌以晉室多難陰圖保

六子御覽 卷一百二十四
據河西追竇融故事筮之遇泰之觀軌喜曰霸者之兆乃求爲涼州公卿亦舉軌拜涼州刺史課農桑拔賢才置崇文祭酒徵九郡胄子五百人立學校以教之永興二年拜安西將軍封樂安鄉侯惠帝崩遣長史北宮純司馬纂別駕陰監奉表京師是歲大城姑臧城匈奴所築也南北七里東西三里地有龍形故名卧龍城永嘉四年十一月黃龍出於臨羌河發水昇天身長十餘丈五年帝遣使拜車騎大將軍開府儀同三司策命未至而劉曜攻陷長安遷晉帝於平陽建興元年晉愍帝卽位於長安遣使者拜軌鎮西大將軍開府儀同三司加侍中封西平郡公固讓不受二年進拜太尉涼州牧以軌年老多疾拜子寔行撫軍副涼州刺史五月軌寢疾立子寔爲世子己丑薨于正寢年六十葬建陵冊贈侍中太尉謚武穆公張祚僭號

追尊武王廟號太宗

張寔

崔鴻十六國春秋前涼錄曰張寔字安遜軌之世子也學尙明察敬賢愛士晉舉秀才除尙書郎永嘉元年固辭驍騎將軍請還涼州帝許之改授議郎西中郎將建興元年長史張璽等表寔嗣位十月帝遣使授西中郎將涼州刺史西平公二年十一月帝將降劉曜進寔侍中司空涼州牧三年始知劉曜逼遷天子平陽大臨三日五年南陽王寶聞愍帝崩自稱晉王號年建康置百官遣拜寔征西大將軍開府儀同三司增邑三千戶六年六月京兆人劉弘挾左道以眩惑百姓密與寔左右十餘人謀殺寔皆懷刀入內斬寔於外寢時年五十葬寧陵晉王寶冊贈寔大司馬涼州牧謚元公張祚僭號追尊曰明王廟號高祖

張茂

崔鴻十六國春秋前涼錄曰張茂字成遜寔之母弟虛靖好學不以勢利爲心建興元年相國南陽王寶辟從事中郎又薦爲給事黃門侍郎皆不就二年徵爲侍中以父疾固辭四年拜秦州刺史加散騎常侍領雍州皆不受寔左司馬陰元等以寔旣被害于駿冲幼宜立長君乃推茂爲大都督太尉涼州牧茂不從以平西將軍行都督涼州諸軍事護羌校尉涼州牧西平公大赦境內九月立寔子駿爲世子三年劉曜遣馮臚拜茂太師涼王四年茂寢疾執駿手泣曰吾先人以孝友見稱自漢以來世康忠順汝謹守忠節無或失墮薨于正寢年四十八劉曜遣使贈太宰謚成烈王張祚僭號追尊曰成王廟號太宗

張駿

崔鴻十六國春秋前涼錄曰張駿字公庭寔之世子永嘉元年生幼而奇偉十歲能屬文茂之四年拜使持節大都督大將軍梁州牧西平公大赦境內劉曜遣使拜大將軍涼州牧元年正月親耕籍田二月始承晉元帝崩問大臨三日四年十二月劉曜爲勒所擒曜太子毗及劉胤等率衆奔上邽六年二月石勒稱天王遣使拜駿征西大將軍涼州牧加五錫之禮八年羣寮勸駿稱涼王置百官駿曰此非人臣所言敢有此言罪不在赦又請立世子乃立重華爲世子十二月鄯善王元孟獻女妹好號曰美人立賓遐觀以處之十四年五月雨雪降霜駿避正殿素服命群寮極言得失十五年以右長史任處領國子祭酒立辟雍明堂而行禮焉命西曹掾集閣內外事付索綏以著涼春秋十一月以世子重華行涼州事十九年八月田于建西

踰玉石縣九月改玉石縣爲金澤縣二十一年始置百官
官號皆擬天朝車服旌旗一如王者酒泉太守馬岌上言
酒泉南山即崑崙之體周穆王見西王母樂而忘歸即謂
此山有石室王母堂珠璣鏤飾煥若神宮禹貢崑崙在臨
羌之西卽此明矣宜立西王母祠以禪朝廷無疆之福駿
從之二十二年六月薨于正德前殿年四十晉遣策贈大
司馬謚忠成公七月葬大陵張祚僭號追尊文王廟號世
祖

張重華

崔鴻十六國春秋前涼錄曰張重華字泰臨駿第二子寬
和懿重沈毅少言駿薨右長史任虬上華爲使持節大都
督太尉涼州牧護羌校尉西平公假涼王大赦境內三年
九月晉遣使者拜侍中大都督隴右諸軍事大將軍涼州

刺史領護羌校尉西平公重華以位號未稱怒不授詔羣
寮上重華爲丞相涼王雍秦涼三州牧五年重華讌羣寮
于閑預庭講論經義顧問索綏曰孔子婦誰家女老聃父
字爲何四皓旣安太子住乎還山乎綏曰孔子婦姓元官
氏女聃父名乾字元杲胎則無耳一目不明孤單年七十
二無妻與隣人益壽氏老女野合懷胎十年乃生老子四
皓還否臣所未悉重華曰鄉不知乎四皓死于長安有四
皓冢爲不還山也七年十月重華寢疾臨春坊遣左長史
馬岌策拜子靈曜爲世子大赦境內十一月薨于平章殿
年二十七葬顯陵張祚僭號追謚栢王廟號世祖

張祚

崔鴻十六國春秋前涼錄曰張祚字太伯駿之長庶子博
學雄武有政治之才駿之二十一年拜延興太守封寧侯

重華薨子靈曜嗣七年十一月右長史趙長等矯稱遺令以祚為使持節都督中外諸軍事撫軍大將軍輔政十二月趙長等議以靈曜冲幼世難未夷宜立長君廢曜為寧涼侯立祚為大將軍護羌校尉涼州牧涼公趙長等議僭即王位于謙光殿大赦改年為和平元年立叱干氏為皇后子太和為太子封弟天錫為長寧侯重華少子玄靖為涼武侯置百官二月尊祖父郊祀天地二年有神降於玄武殿自稱玄冥與人交語祚日夜祈之神言與福利祚甚信之征東張瓘遣兵傳檄廢祚以侯還第復立靈曜八月祚收瓘弟琚及其子嵩等驍騎將軍宋混兄脩素與祚有隙祚疑之混西奔招合夷晉眾至萬餘人還向姑臧祚大懼遣楊秋胡將靈曜於苑拉音獵其腰而殺之堆於沙坑九月宋混次于武始大澤為靈曜發哀閏月混至姑臧祚登

神雀觀張琚張嵩煞祚守卒死者四百餘人斬西門關內混領軍趙長開宮門以應琚長馳入殿中大呼稱萬歲祚以長敗賊下觀勞之長奮槊音刺祚中額奔入萬秋閣為廚士徐黑所殺以庶人禮葬之天錫即位備禮改葬于愨陵追謚威王封子廷堅為金澤侯

崔鴻十六國春秋前涼錄曰張玄靖字元安重華少子母郭夫人和平二年宋混張琚等上玄靖為大將軍涼州牧護羌校尉西平公時年七歲張瓘至姑臧推立玄靖為大將軍涼王自為使持節都督中外諸軍事尚書令涼州牧張掖郡公四年五月東苑大冢上忽有地陷為澤地燃廣袤數丈執法御史杜逸言於瓘曰此皆變之大者可移之他族瓘徵兵數萬集於姑臧謀討宋氏混與弟澄及左右

壯士楊和等四十餘騎奔入南城申令諸營曰張瓘謀逆被太后詔誅之俄而衆至二千瓘率衆出戰混擊敗之衆悉去瓘自殺混入見玄靖以混爲使持節都督中外諸軍事驃騎大將軍酒泉郡侯輔政五年六月大旱令諸祈雨之官皆詠雲漢詩儒林祭酒索綏曰雲漢陳周宣之美非旱之文昔神鼎之出漢虞丘不賀今辭與事違恐非致澤之意也綏字士艾燉煌人父戢晉司徒綏家貧好學舉孝廉爲記室祭酒母喪去官又舉秀才著涼春秋五十卷又作六夷頌符命傳十餘篇以著述之功封平樂亭侯六年宋混卒天錫以使持節都督中外諸軍輔政八月右將軍齊肅等議以靖多難務殷須立長君勸天錫自立閏月天錫遣肅等夜害玄靖時年十四葬平陵謚冲王

張天錫

崔鴻十六國春秋前涼錄曰張天錫字純嘏駿之少子母曰劉美人玄靖八年即位年十八謁于太廟尊母劉氏爲太后元年四月秦遣鴻臚回國拜天錫大將軍涼州牧西平公三年姑臧北山楊樹生松葉西苑牝鹿生角東苑銅佛生毛延興地震陷裂水出天錫避正殿引咎責躬晉遣使拜隴右關中諸軍大將軍涼州牧西平公八年郡國火燃於泥中三十所苻堅復有并兼之規天錫大懼遣從事中郎韓博奉表於晉又與相溫書尅其年大舉都會上邽十年以世子懷爲使持節鎮西將軍高昌郡公次子太豫爲世子豫母焦氏爲左夫人七月大水地震西平五十日中地十動土樓崩天錫疾美人閻姬薛姬皆自殺二姬國色並有殊寵天錫每謂之曰女二人將何以報我我死之後豈可更爲人妻皆曰尊若不諱妾請效死於前酒掃於

地下無他志十月天錫疾瘳大赦境內追悼二姬葬以夫人禮十三年五月苻堅遣武衛將軍苟長等率衆十萬來伐天錫遣中衛將軍史景等拒戰赤岸爲秦所敗天錫納左長史馬苒之言面縛降秦東徙長安拜歸義侯北部尙書遷右僕射隨苻堅敗於淮南又入晉爲眞外散騎常侍復本封薨贈鎮西將軍謚悼公張軌以晉永寧九年辛酉之歲收涼州至天錫敗亡之歲歲在丙午八主七十六年

西涼李暠

崔鴻十六國春秋西涼錄曰李暠字玄盛隴西狄道人也漢前將軍廣十六世孫廣子侍中敢之後李世爲西州右姓祖父弇音掩前涼武衛將軍天水太守安世亭侯父昶字中堅幼有令名世子侍講年十八卒暠昶之遺腹子少而好學沉敏有器度後涼龍飛二年建康大守段業自稱涼

牧號神璽元年拜暠郊穀令二年燉煌索仙等以暠温毅有惠政推暠爲燉煌太守段業復暠鎮西將軍領護西夷校尉庚子元年十一月晉昌太守唐瑤移檄六郡推暠爲大將軍涼公領秦涼二州牧大赦改年追尊祖弇涼景公父昶涼簡公以瑤爲征東將軍三年正月於南門起靜恭堂以議朝政圖讚自古聖帝明王忠臣孝子烈士貞女親爲序頌以作鑒戒五年正月立泮宮增高門學生百人四月燉煌有葛緣木而生作黃鳥之形世子譚卒九月立二子欵爲世子正月大赦改年爲建初元年三月讌于曲水命群寮賦詩暠親爲之序文寫諸葛亮訓誠以厲諸子十三年正月寢疾顧命長史宋繇曰吾終之後嗣子猶卿子也善相輔導二月薨于恭德殿年六十七葬建世陵謚昭武王廟號太祖初暠爲群雄所推定千里之地謂張氏之

業不足成河西十郡歲月而一旣而僭檀入據姑臧蒙遜
基宇稍廣於是慨然著述志賦初河右不生楸槐張駿之
世取秦隴植之皆死至是而酒泉宮西北有槐生焉乃作
槐樹賦又作婦辛氏誄自餘賦數十篇

李歆

崔鴻十六國春秋西涼錄曰李歆字士業暉第二子暉薨
左長史宋繇等上爲大將軍涼公領涼州牧護羌校尉大
赦改年爲嘉興元年七月歆聞蒙遜南伐西秦命中外戒
嚴將攻張掖尹太后以爲不可宋繇亦諫歆怒不從遂率
步騎三萬東伐次于都灑澗蒙遜自浩亶來戰于懷城歆
敗左右勸還歆曰吾違太后明誨遠取敗辱不煞此胡復
何面目以見母也勒衆復戰敗于蓼泉爲遜所煞歆弟驍
騎將軍翻擊虜將軍豫等西奔燉煌遜遂入酒泉翻及燉

煌太守恂與諸子等奔燉煌奔於北山郡人宋承張弘等
以恂在郡有惠政密信招恂恂率數千騎入於燉煌宋承
推恂爲涼州刺史遜率衆二萬攻恂宋承等開門出降恂
自煞恂暉之弟六子也遜獲翻子寶徙于姑臧歲餘北奔
伊吾後二十餘年至魏太平三年寶自伊吾率流人及虜
騎南襲燉煌據之遣使降魏魏以寶爲使持節侍中都督
西垂諸軍事鎮西大將軍開府儀同三司領護西戎校尉
沙州牧燉煌公承制玉門以西寶寬雅有度量甚著威惠
於西土在燉煌三年徙并州刺史薨謚宣公自暉元年歲
在庚子至爲蒙遜所滅二十一年

北涼沮渠蒙遜

崔鴻十六國春秋北涼錄曰沮渠蒙遜臨松盧水胡人其
先世爲匈奴左沮渠遂以官爲氏遜好學涉群史雄烈有

英略後涼龍飛二年遜伯父羅仇麴粥從呂光征河南光前軍大敗皆爲光所煞宗部會葬者萬餘人遜哭謂衆曰昔漢祚中微吾之乃祖翼獎寶融保寧河右呂王耄荒虐民無道豈可坐觀成敗不上繼先祖安民之志下使二父有恨黃泉衆咸稱萬歲遂立盟約一旬之間衆至萬餘與從兄男成推建康太守段業爲涼州牧建康公改龍飛二年爲神璽元年業以遜爲張掖太守男成爲輔國大將軍委以軍國之任永安元年三月遜以爲業所憚內不自安請爲安西太守四月業收男成賜死遜聞男成死泣告衆曰男成忠於段公枉見屠害諸君能爲報仇乎成素有恩信衆皆憤泣從之北至氐地衆餘一萬業遣右將軍田昂武衛將軍梁中庸等攻侯塢遜自氐地救之昂率騎五百歸遜軍遂大潰中庸來奔五月遜至張掖田昂兒子承愛

斬關內遜業左右散走遜大呼曰鎮西何在軍人口在此業曰孤單飄一己爲貴門所推可見乞餘命投身嶺南庶得東還與妻子相見遜遂斬之六月右長史梁中庸等推遜爲大將軍涼州牧張掖公大赦改元四年秦遣鴻臚梁斐拜遜鎮西大將軍開府儀同三司沙州牧西海公九年二月兩月並出正始元年冬十月遷都姑臧十一月僭即河西王位于謙光殿大赦改元置百官始如呂光爲三河王故事二年四月立子政德爲世子三年二月與西秦通和遜西巡遂循海至鹽池祀西王母寺寺中有玄石神圖命中書侍郎張稷賦焉銘之于寺前十四年起遊林堂於內苑圖列古聖賢之象九月堂成遂讌群臣談論經傳顧謂郎中劉昞曰仲尼何如人也昞曰聖人也遜曰聖人者不凝滯於物而能與世推移畏于匡辱于陳伐樹削迹聖

人固若是乎。晒不能對。遜曰：卿知其外，未知其內。昔魯人有浮海而失津者，至于亶州，仲尼及七十二子遊于海中，與魯人一木杖，令閉目乘之，使歸。告魯侯，築城以備寇。魯人出海投杖水中，乃龍也。具以狀告魯侯，不信。俄而有羣鷓數萬，銜土培城。魯侯信之，大城曲阜，訖而齊寇至，攻魯不尅，而還。此其所以稱聖也。義和元年十一月，魏遣太常李愼拜遼太傅、涼州牧、涼王，加九錫之禮。三年夏四月，遜寢疾，立子茂虔爲世子，薨於路寢。五月，葬元陵，謚武宣王，號太祖。

沮渠茂虔

崔鴻十六國春秋北涼錄曰：沮渠茂虔，遜第三子，聰穎好學，和雅有度量。義和三年，立爲世子，加中外都督、大將軍。錄尚書遜薨，僭卽河西王位，大赦改年爲永和元年，立子

封壇爲世子，加撫軍大將軍、錄尚書事。三年正月，西中郎將燉煌太守沮渠唐兒上言：月十五日有一老父見於郡城東門，投書於地，忽然不見。其書一紙，八字滿之，文曰：涼王三十年，若七年，虔訪於奉常張慎，慎曰：昔號將亡，神降于莘，深願陛下尅念脩政，以副三十之慶。若盤于遊田，荒于酒色，臣恐七年將有大變。虔不悅。七年正月，朝群臣于謙光殿，有狐在于東序門者，不見其入，左右以告，命射之，不獲。二月，端門崩，初虔爲酒泉太守，起浮圖於中街，有石像，在焉。是月，日流血。五月，太廟基陷。六月，當陽門崩。魏常山王赤堅率衆至姑臧，虔嬰城拒守。九月，面縛出降。魏釋其縛，徙虔及宗室士民十萬戶于平城。拜虔征西大將軍。王如故。八年，賜死，謚哀王。自遜永安元年歲在辛丑，至是歲庚寅三十九載。

晉書曰蒙遜以安帝隆安元年自稱州牧義熙八年僭立後八年而宋氏受禪以元嘉十年死時年六十六在位三十二年子茂虔立六年為魏所滅

太平御覽卷第一百二十四

王三十三... 太平御覽卷第一百二十四... 王三十三... 太平御覽卷第一百二十四... 王三十三...

太平御覽卷第一百二十五

偏霸部九

後涼呂光

呂纂

呂隆

後燕慕容垂

慕容寶

慕容盛

慕容熙

慕容雲

後涼呂光

崔鴻十六國春秋後涼錄曰呂光字世明略陽人其先自沛遷略陽因家焉世為氐酋父婆樓字廣平佐命前秦官至太尉光以趙建武中生於枋頭夜有神光之異故名焉年十歲與諸童兒遊戲邑里為戰陣之法童兒咸推為主長而身長八尺四寸目重童子左肘有肉印沈粹凝重寬簡有大量人莫之知唯王猛異之曰此非常人言之符堅舉賢良除美陽令民夷憚愛隣境肅清遷鷹揚將軍以功

賜爵關內侯建元十九年以光爲使持節西討諸軍率將
軍姜飛彭晃杜進等步騎七萬討西域十二月至龜茲龜
茲王帛純捍命不降光軍其城南五里爲一營深溝高壘
廣設疑兵爲木人被甲羅之壘上以爲持久之計二十年
五月帛純乃傾財寶請救於獯胡獯胡王遣弟率二十餘
萬救之胡便弓馬善矛槊鎧如連鑣射不可入乃以革索
爲羅策馬擲人多有中者衆甚憚之姑默宿尉頭等國及
諸胡外內七十萬人光遷營相接陣爲勾鑣之法精騎爲
遊軍彌縫其闕秋七月戰于城西大敗之帛純逃奔王侯
降者三十餘國進入其城城有三重廣輪與長安城等城
中塔廟千數帛純宮室壯麗煥若神居胡人奢侈富於生
養家有蒲桃酒至千斛經十年不敗士卒淪沒酒藏者相
繼諸國貢款屬路立帛純弟震爲王以安之光撫寧西域

威恩甚著秦以光爲使持節散騎常侍玉門巴西諸軍事
安西將軍西域校尉進封順鄉侯二十一年正月大饗文
武博議進止衆咸請還光從之三月引還以駝二萬餘頭
致外國珍異千餘品駿馬萬餘匹而還九月光入姑臧自
領涼州刺史護羌校尉大安元年苻丕以光爲車騎大將
軍涼州牧領護西域大都督酒泉公光始聞苻堅爲姚萇
所害奮袂哀怒三軍縞素大臨于城南傳檄諸州期孟冬
大舉諡堅爲文昭皇帝十月大赦境內改建元爲大安十
一月羣寮勸進日長虵未殄方掃清國難宜進位元台十
二月上光爲侍中中都督隴右諸軍大將軍涼州牧酒
泉公三年八月甘露降逍遙園白鸞翔于酒泉鸞成列而
從之麟嘉元年正月麟見金澤縣百獸從之於是羣寮奉
表請崇進名號光從之二月僭卽王位于南郊大赦改元

置官司丞郎以下猶攝州縣事三年九月大廟新成追尊
父爲景昭王祖爲宣公會祖爲恭公高祖爲敬公龍飛元
年五龍見于浩亶群臣咸賀勸光稱號六月僭卽天王位
于南郊大赦改年備置群司立世子紹爲太子四年九月
光寢疾十二月疾甚立太子紹爲天王光自號太上皇帝
以子纂爲太尉弘爲司徒詔曰吾疾病不濟吾終之後使
纂統六軍弘管朝政汝恭己無爲委重二兄庶可以濟今
外有強寇民心未寧汝兄弟輯睦則貽厥萬世若內相圖
則禍不旋踵纂弘泣曰不敢有二心薨葬高陵謚武皇帝
廟號太祖

呂纂

崔鴻十六國春秋後涼錄曰呂纂字永緒光之長庶子母
趙淑媛少便弓馬不好書大安元年至于姑臧光臨薨執

手戒之曰汝性麤武深爲吾憂開基旣難守成不易善輔
永業勿聽讒言光薨紹秘不發喪纂排閤入哭盡哀而出
紹懼以位讓之曰兄功高年長宜承大統纂曰臣雖長陛
下國家之適不可以私愛而亂大倫驍騎呂超謂紹曰纂
臨喪不哀步高視遠觀其舉止恐成大變宜早除之纂聞
超謀遂率壯士數百踰北城攻廣夏門入自青角門昇謙
光殿紹登紫閣自殺呂超出奔廣武纂遂僭天王位大赦
改龍飛四年爲咸寧元年謚紹隱王纂遊田無度荒耽酒
色常與左右因醉馳獵於坑澗之間殿中侍御史王回扣
馬諫不納番和太守呂超擅伐鮮卑思盤思盤訴超於纂
纂召超入朝怒曰卿恃兄弟相相欲欺吾也要當殺卿然
後天下可定超頓首曰不敢纂引諸臣讌于內殿呂隆屢
勸纂酒已至昏醉乘步輓車將超等遊于內至琨華堂東

閣車不得過纂親將竇川駱騰倚劔于壁推車過閣超取
劔擊纂纂下車擒超超刺纂洞胷奔于宣德堂將軍魏益
入斬纂首以徇隆既纂位謚纂靈帝葬白石陵

呂隆

崔鴻十六國春秋後涼錄曰呂隆字永基光弟寶之子既
殺纂遂僭即王位大赦改咸寧三年爲神鼎元年二月追
尊父寶爲文皇帝超有佐命之勳拜爲侍中都督中外諸
軍事輔國大將軍錄尚書事封安定公二年秦遣鴻臚恒
敦拜隆征北大將軍河西諸軍事涼州牧建康公三年隆
以二涼之逼遣超賚珍寶請迎于秦遣尚書左僕射齊難
率步騎四萬來迎隆率戶一萬隨難東遷既至長安秦以
隆爲散騎常侍尚書公如故超爲安定太守其後坐與姚
興少子廣平公弼謀反誅呂光以乙酉歲據涼州至于是

歲歲在癸卯凡一十九年

後燕慕容垂

崔鴻十六國春秋後燕錄曰慕容垂字道明皝第五子小
字阿六敦母蘭淑儀垂少有器度長七尺七寸手垂過膝
皝甚寵之常曰此兒關達好奇終能破人家或能成人家
故名霸字道業因墜馬傷前二齒後改名皝外以慕容皝
爲名內實惡而改之尋以譏訖之文去史以垂爲名雋稱
尊號封吳王建熙十年以車騎大將軍敗相温於枋頭威
名大震太傅上庸王評深忌之垂遂出奔秦符堅聞垂至
大悅郊迎執手禮之甚重王猛惡垂雄略勸堅殺之堅不
從以爲寇軍將軍封賓都侯歷京兆尹符堅敗於淮南垂
軍獨全堅以千餘騎奔之世子言於垂曰家國傾喪皇綱
廢弛當隆中興之業建少康之功宜恭承皇天之意因而

取之垂白彼悉心投命若何害之乃以兵屬垂至澠池言於堅曰王師不利北境之民或因此輕動臣請奉詔輯寧朔裔且龍鄴舊都陵廟所在乞過展拜以申罔極堅許之權翼諫曰垂爪牙名將今之韓白且世豪東夏志不爲人下頃避禍歸誠非慕義也而恐冠軍之號不飽其志列地百里未滿其心且垂猶鷹也飢則附人飽便高颺遇風塵之會必有凌霄之志堅曰卿言是也但朕已許之匹夫猶重信況萬乘之主乎翼曰陛下重小信而輕忽社稷臣見其往不見其還關東之變垂其首乎自涼馬臺結草筏而渡至安陽脩牋於長樂公丕垂至館之於鄴西會苻暉告丁零翟斌聚衆四千謀逼洛陽丕於是配垂兵二千遣廣武將軍苻飛龍率氏騎一千爲垂之副貳戒飛龍曰垂爲三軍之統卿爲垂之謀主苻暉告急簡書相尋垂方圖飛

龍停河內不進悉誅氏兵命左右殺飛龍濟河焚橋衆三萬至洛陽符暉閉門拒守不與交通翟斌率衆會垂勸稱尊號垂曰新興侯國之正統孤之君也若以諸君之力得平關東當以大義喻秦奉迎反正誣上自尊非孤心也乃自稱大將軍燕王承制行事翟斌爲建義將軍封河南王弟德爲范陽王衆至二十萬濟自石門長驅攻鄴元年正月朝群寮于清陽宮以暉在長安依晉愍帝在平陽中宗稱王改年建武故事改秦建元爲燕元年立太子寶爲燕王太子攻拔鄴鄒丕固守中城垂壅而圍之於魏郡肥鄉築新興以置輜重進師攻鄴開其西奔之路二年三月丕奔鄴奔并州以魯陽王和爲南中郎將鎮鄴十二年垂定都中山建興元年正月羣寮勸垂正尊號辛卯僭即皇帝位於南郊大赦改元立子寶爲皇太子十年五月太子寶

率衆八萬伐魏范陽王德爲之後繼魏聞寶將至徙于河西寶臨河不敢濟引師還次於參合俄而魏軍大至三軍奔潰寶與德等數千騎奔免十一年三月垂大衆出參合太子寶出天門垂至參合見積骸如山設祭吊之死者父兄各皆號哭軍中哀慟垂慙憤嘔血因而寢疾築燕昌城而還寶等至雲中間垂疾皆引歸及垂于平城夏四月薨于上谷之徂陽年七十一謚武成皇帝廟號世祖

晉書曰垂以太元二十一年死在位十三年墓曰宣平陵

慕容寶

崔鴻十六國春秋後燕錄曰慕容寶字道祐垂第四子元璽四年生于信都少輕果無志操好人佞己段后謂垂曰太子姿質雍容柔而不斷非濟世之雄遼西高陽陛下兒之賢者宜擇一樹之垂不納謂曰汝謂我爲晉獻公乎建

興十一年四月僭即皇帝位大赦改爲永康元年寶遣將軍趙王麟逼段后曰常謂主上不能嗣守大統今竟不能宜早自裁以全段氏后怒曰汝兄弟尚逼殺母豈能保守社稷吾豈惜死念國滅不久遂自殺八月立妃段氏爲皇后濮陽公榮爲皇太子二年正月魏使脩和寶不許二月魏攻中山其夜尙書慕容皓謀殺寶立趙王麟寶與太子榮等萬騎就清河王會于薊以開封公慕容詳守中山五月詳遂僭稱尊號九月趙王麟率衆入中山殺詳麟復僭尊號中山飢麟出據新市與魏師戰于義臺敗績南奔魏入中山寶遣御史中丞兼鴻臚魯遂持節授司徒范陽王德丞相翼州牧承制南夏封公侯牧守三年二月寶發龍城以撫軍慕容騰爲前軍步騎三萬將南伐次于乙連長上段速骨宋赤眉因民之憚遠役殺司空樂浪王宙衆旣

幸亂投仗奔走寶馳還龍城又與長樂王盛等南奔尚書
蘭汗殺速骨等十餘人奉太子榮承制大赦遣迎寶還于
薊寶欲北還盛等咸以汗忠款虛實未明宜就范陽王德
寶從之乃自薊而南四月寶至鄴鄴中遺民固請留之寶
不從南至黎陽城西聞范陽王德稱制懼而退乃還龍城
次于廣都蘭汗又遣左將軍蘇超迎寶具申款誠忠節無
差寶於是命發汗遣弟難率五百騎逆寶至龍城難引寶
入于外邸殺之年四十四殺太子榮及王公卿士百餘人
汗自稱大將軍大單于昌黎王號年青龍七月長樂王盛
襲誅汗盛即位偽謚寶惠愍皇帝廟號烈宗

慕容盛

崔鴻十六國春秋後燕錄曰慕容盛字道運寶之庶長子
秦建元十年生于長安二十年苻堅誅慕容氏盛奔東歸

至垂問以西事畫地成圖垂笑謂之曰昔魏武撫明帝之
首遂乃侯之祖之愛孫有由來矣於是封長樂公建興六
年領北中郎領薊爵爲王及寶爲蘭難所殺盛馳赴哀盛
潛結大衆謀討難及汗等斬之建平元年七月告成宗廟
大赦改青龍元年謙揖自卑不稱尊號以長樂王稱制諸
王貶爵爲公東陽公慕容根等九十八人上尊號盛不許
十月根等又請盛許之丙子僭即皇帝位正月朝群臣于
承乾殿大赦改建平元年爲長樂元年二年正月大赦盛
去皇帝之號稱庶民天王三年八月右將軍慕容國謀率
禁兵襲盛前將軍段璣等因衆心阻動潛於禁中鼓譟大
呼盛聞變率左右出戰衆皆披潰一賊從閤中擊盛傷足
遂取輦昇前殿召叔父河間公熙囑以後事熙未至而薨
年二十九偽謚昭武皇帝廟號中宗

晉書曰盛幼而羈賤流漂長則遭家多難夷險安危備嘗之矣懲寶闇而不斷遂峻極威刑纖介之嫌莫不裁之於未萌防之於未兆於是上下震恐人不自安雖推忠誠親戚亦皆離貳舊臣靡不夷滅安忍無親所以卒於不免是歲隆安五年也

慕容熙

崔鴻十六國春秋後燕錄曰慕容熙字道文一名長生垂之少子燕元二年生于常山建興八年封河間王永康初隨寶奔龍城拜司隸校尉長樂元年遷僕射中外都督領昌黎尹盛薨遂僭即皇帝位大赦改長樂三年爲光始元年二年正月熙引見州郡耆舊于東宮問以民所疾苦司隸部民劉瓚對問稱旨拜帶方太守是春大治宮室四月立苻貴人爲昭儀五月築龍騰苑廣十里餘役徒二萬起

景雲山于苑內又起逍遙宮甘露殿連房數百觀閣相交鑿天河渠引水入宮又爲苻昭儀鑿曲光海清涼池季夏暑熱士卒不得休息暍死者半四年二月昭儀苻氏卒苻貴嬪爲皇后九月苻后遊畋熙從之北登白鹿山東過青嶺南臨滄海冬十一月乃還百姓苦之士卒爲虎狼所害及凍死者五千餘人五年十月擬鄴之鳳陽作弘光門累級三層建始元年正月大赦天下三月太史丞梁延年夢月化爲五白龍夢中占之曰月臣也龍君也月化爲龍當有臣爲君寤而告人曰國祚其將盡乎是月苻后起承華殿高承光一倍負土於北門土與穀同價典軍杜靜載棺詣闕上書諫熙大怒斬之后嘗季夏思凍魚鱸冬須生地黃皆下有司切責不得加以大辟四月苻后卒熙悲號躡踊若喪考妣擁其尸而撫之曰體已就冷命遂斷矣於是

九平御覽 卷一百一十五
七
僵仆絕息久而乃蘇服斬縗食粥百寮宮內設位哭臨有司按檢哭者有淚則不無淚則加罪羣臣振懼莫不含辛以爲淚高陽王妃張氏熙之嫂也美姿容熙欲以爲殉乃毀其襪中有弊羶遂賜死三女叩頭求哀熙弗許營陵周輪數里下固三泉內圖書尚書八座之像熙曰善爲之朕將隨后入此陵轎車高大毀北門而出中衛將軍馮跋左衛將軍張興先皆坐事亡奔以熙政之虐也與跋從兄萬泥等三十二人結盟推夕陽公慕容雲爲主發尚方徒五千人分屯四門入宮授甲閉門拒守中黃門趙洛生奔告熙熙曰此鼠盜耳朕還當誅之乃收髮貫甲馳還赴難夜至龍城攻北門不尅遂入龍騰苑左右潰散熙微服逃于林中爲人執送雲等殺之年二十三雲葬之微平陵謚曰昭文皇帝

晉書曰垂以孝武帝太元八年僭立至熙四世凡二十四年以安帝義熙二年滅

慕容雲

崔鴻十六國春秋後燕錄曰慕容雲字子雨寶之養子祖父和高勾麗之支庶自云高陽氏之苗裔故以高爲氏寶之爲太子雲以武藝給侍東宮永康初拜侍御郎以疾去官及熙葬后馮跋詣之告以大謀雲懼跋等強之四月即天王位復姓高氏大赦改建始元年爲正始元年國仍號大燕以馮跋爲侍中中都督錄尚書事武邑公二年慕容歸爲遼東公主燕之宗祀三年冬十月雲臨東堂幸臣離班桃仁懷劔執紙而入稱有所啓抽劔擊雲雲以几拒跋桃仁進而殺之推立馮氏爲主跋即位謚爲懿惠皇帝始垂以丙戌之歲建號中山馮跋即位之歲歲在己酉二

王太初元年正月改元自稱大將軍大單于西平王以弟鹿孤爲驃騎將軍僭檀爲車騎將軍二年改稱武威王三年正月徙治樂都八月孤因酒走馬馬倒傷脇笑曰幾使呂光父子大喜俄而患甚顧謂羣臣曰方難未靖宜立長君言終而薨謚武王廟號烈祖

晉書曰禿髮烏孤其先與後魏同出八世祖疋孤率其部自塞北遷于河西其地東至麥田牽屯西至顯羅南至澆河北接大漠疋孤子壽闐之在孕母胡掖氏因寢而產於被中鮮卑謂被爲禿髮因而氏焉

禿髮利鹿孤

崔鴻十六國春秋南涼錄曰利鹿孤烏孤弟太初三年八月卽位大赦徙治西平建和元年正月大赦改年延耆老訪政治二年羣臣固請卽尊號不許乃僭稱河西王三年

三月寢疾令曰昔我諸兄弟傳位非子者蓋以泰伯三讓周道以興故也武王創踐寶曆垂諸樊之試終能克昌家業者其在車騎乎吾寢疾憊頓是將不濟內外多虞國機務廣其令車騎經摠百揆以成先王之志薨謚康王葬西平陵

禿髮儂檀

崔鴻十六國春秋南涼錄曰儂檀利鹿孤弟也少機警有才略建和三年襲位僭號涼王遷于樂都改爲弘昌元年秦遣使拜車驃將軍廣武公四年六月秦遣授河右諸軍事涼州刺史鎮姑臧七月醜群寮于宣德堂仰視而歎曰古人言作者不居居者不作信矣前昌松太守孟禕進曰張文王築城苑繕宮廟構此堂爲貽厥之資萬世之業秦師濟河漙然瓦解此堂之建年垂百載十有三主唯信順

六平御覽 卷一百一十六
可以久安仁義可以永固願大王勉之檀曰非君無以聞
讜言也八月以鎮南大將軍文支鎮姑臧檀遷于樂都雖
受制於秦車服禮制一如王者十一月遷于姑臧嘉平元
年十二月僭卽涼王位於南郊大赦改年嘉平置百官立
世子虎臺爲太子二年正月以子明德歸爲南中郎將領
昌松太守歸僂爽聰悟檀甚寵之年始十三命爲昌高殿
賦援筆卽成影不移漏檀覽而善之擬之曹子建七年僭
檀議欲西征乙弗孟愷諫曰連年不收上下飢弊南逼熾
盤北迫蒙遜今遠征雖尅後患必深僭檀曰孤將略地鄉
無沮衆謂其太子武臺曰今不種多年內俱窘事宜西行
以拯此弊蒙遜近去不能卒來且夕所慮唯在熾盤彼名
微衆寡易以討禦吾不過一月自足周旋汝謹守樂都無
使失墜僭檀乃率騎七千西襲乙弗大破之獲牛馬羊四

十餘萬熾盤乘虛來襲一旦而城潰安西樊尼自西平奔
告僭檀僭檀謂衆曰今樂都爲熾盤所陷卿等能與吾藉
乙弗之資取契汗以贖妻子者是所望也遂引師而西衆
多逃反遣鎮北段荀追之荀亦不還於是將士皆散僭檀
曰熾盤昔委質於吾今而歸之不亦鄙乎四海之廣無所
容其身何其痛哉吾老矣寧見妻子而死遂歸熾盤六月
至西平盤遣使郊迎以上賓之禮歲餘爲熾盤所鳩蓋景
王時年五十一武臺亦爲熾盤所害少子保周歸魏魏以
爲張掖王自烏孤太初元年歲在丁酉至檀薨之歲甲寅
十有八歲
晉書曰烏孤以安帝隆安元年僭立至僭檀三世凡十九
年以安帝義熙十年滅

南燕慕容德

崔鴻十六國春秋南燕錄曰慕容德字玄明號之少子號每對諸官人言婦人姪娠夢日入懷必生天子公孫夫人方娠夢日入臍中獨喜而不敢言晉咸康二年晝寢生德左右以告方寤而起號曰此兒易生似鄭莊公長必有大德遂以德爲名年十二而號薨哀毀過禮年十八長八尺二寸額上有日月兩角下偃月重文元璽初封梁公建熙初進號安北將軍封范陽王入爲魏尹秦滅燕徙於長安秦伐涼德請征自效後爲張掖太守苻堅伐晉垂請德爲副堅敗德乃隨垂如鄴垂稱燕王復封范陽王建興元年爲司隸校尉八年拜司徒垂臨薨謂太子寶曰鄴是舊都宜委范陽王永康元年以德鎮鄴及寶失中山奔龍城以德爲丞相領冀州承制南夏德曰中山旣沒魏必乘勝來攻鄴元年正月德率戶四萬三千車二萬七千乘自鄴徙

滑臺黎陽魏軍垂至三軍危懼欲堡據黎陽昏日流澌冰合是夜濟訖冰亦尋消德大悅改黎陽津爲天橋津德入滑臺趙王麟等九十八人上言今中山傾陷龍都蕭條趙魏遺黎鶴企皇澤伏願仰承俯順以安宗廟謹上皇帝尊號德許之令曰今假順來議且依燕元故事統符行帝制奏詔而已改永康三年爲元年大赦殊死已下置百官封進有差寶自龍城南奔至黎陽城西數里伏于河西遣中黃門趙思告北地王鍾曰上去二月得丞相表即自南征段速骨作逆于乙連今失據來此呼丞相奉迎鍾馳使白狀寶遣思之後見採樵者知德稱帝懼而北奔初苻登旣滅登弟廣率所部三千來降拜冠軍虜之乞活壘至是復叛稱秦王德留撫軍魯陽王和守滑臺德率衆攻廣斬之和長史李辨殺和以滑臺降魏德曰符廣雖平撫軍失

太平御覽 卷一百一十六
據進有強敵退無所託計將安出尚書潘聰曰滑臺四通八達非帝王之居青齊沃壤號曰東秦地方二千里戶餘十萬四塞之固可謂用武之國德猶頽未決於是遣牙門蘇撫問沙門朗公報曰山栖絕俗之士不應預聞朝議但有待之累非有訖無以立陛下今來即朗之檀越敬覽潘尚書之議可謂興邦撫又問以年世朗以周易筮之曰燕衰庚戌撫曰幾何曰年則一紀世則及子撫曰何其促乎朗曰卦兆然也豈關人哉撫祕不敢言德大悅三月德引師而南五月次薛城八月入廣固卽皇帝位于南郊大赦改元爲建平元年又曰漢宣憫吏民犯諱故改名朕今增一備字以爲復名庶開臣子避諱之路於是敘賞有差褒德任賢新舊咸悅十月太極端門並就以公匠張剛爲材官將軍尚方令二年十月徐州刺史潘聰青州刺史鞠仲

來朝讌于延賢堂酒酣德嘆謂羣臣曰朕雖寡薄拱己南面在上不驕夕惕于位可稱自古何等主也仲曰陛下中興之聖后少康光武之儔也顧命左右賜仲帛千匹仲疑多陳讓德曰卿知調朕朕不知戲卿乎卿飾對非實故亦虛言相賞不賞謬加何足謝也韓範進曰臣聞天子無戲言忠臣無妄對今日之論可謂君臣俱失德大悅賜範綰五十四匹三年三月德如齊城登營丘望見晏嬰塚顧左右曰禮大夫不逼城葬平仲古之一賢人達者而生居近市死葬近城豈有意乎青州秀才晏謨對曰孔子稱臣先人平仲賢矣豈不知高其梁豐其禮蓋政在家門故儉以矯世在居湫隘卒豈擇地而葬乎所以不遠門者猶冀悟平生意也德悅之三月以太牢祀漢城陽景王廟遂北登社首山東望鼎足因日牛山問謨以齊之山川賢哲故事謨

歷對詳辨畫地成圖德深嘉之拜尚書郎五年二月夜地震在栖之雞皆驚擾飛散三月德疾動經旬幾於不振會前尚書右丞曹默自冀州來奔以白酒解之乃瘳以默爲御史中丞封永熙侯六年正月兄子超自秦還九月汝水竭十一月德疾篤夜夢魘曰汝旣無子何不早立超爲太子不爾惡人生心戊午引見羣臣于東陽殿議立超爲太子俄而震起百寮驚越德亦不安遷宮疾甚呼段后公主及超申以後事執超手曰若得至曉更見公卿願託以汝死無所恨舉目視公主欲有所言竟遂不能段后大言今日召董中書造詔立超開目領之是夕薨于顯安宮年七十爲十餘棺夜分出門潛瘞山谷莫知其屍所在虛葬于東陽陵謚獻武皇帝廟號世宗在位五年

慕容超

崔鴻十六國春秋南燕錄曰慕容超字祖明德兄北海王納之子秦滅燕以納爲廣武太守數歲去官與母公孫太妃就弟德於張掖德從苻堅南征留金刀辭母而去及垂起山東張掖太守苻昌誅納及德之諸子公孫太妃以耄不合刑納妻段氏以懷妊未決執于郡獄獄掾呼延平德故吏也將公孫段氏逃于羌中而生超焉公孫氏臨卒授超金刀曰聞汝伯已中興於鄴都吾朽病將沒相見理絕汝脫得東歸可以此刀還汝叔也後因呂隆歸秦秦徙涼州民於長安超因而東歸母謂超曰母子得全濟者呼延氏之力也惠而不報天不祐人平今雖死吾欲爲汝納其女以答厚惠於是納之超至長安佯狂行乞由是往來無禁濟陰人宗正謙善卜相西至長安賣術于路超行而遇之因就謙相謙奇其姿貌超乃內斷于心不告母妻辭母

諸霸上乃與謙俱歸至諸關禁自稱張伏生二十日達梁父建平六年四月至廣固呈以金刀且宣祖母臨終之言德撫之號慟超身長八尺腰帶九圍姿器魁傑有類於德德愛之名之曰超封北海王拜侍中驃騎大將軍司隸校尉開府置佐十一月立爲太子己未僭即皇帝位大赦改建平六年爲太上元年三年七月遣中書令韓範聘秦姚興許還超母妻八月秦使兼負外散騎常侍韋宗還聘贈以千金超復遣右僕射張華給事中宗正元聘秦送大樂伎一百二十人姚興大悅還超母妻十月華發長安宗正元馳先反命超大悅遣征虜公孫五樓率騎三千迎于境上超親率六宮迎於馬耳關四年正月大赦尊父北海穆王爲穆皇帝母段氏爲皇太后居長樂宮妻呼延氏爲皇后五年二月晉相劉裕率衆來伐三月晉師渡淮超聞晉

軍之盛自率衆四萬距戰大敗奔還廣固徙郭內民入堡小城晉攻陷大城長圍列守超請爲藩臣以大峴爲界裕不許六年正月超登天門朝群臣于城上殺馬以饗將士十一月尙書悅壽開門納晉師超出奔爲晉所執送建康市斬之時年二十六殺鮮卑王公已下三千餘人以男女萬餘口爲軍賞始德建平元年歲在己亥僭號居齊至爲劉裕所滅在己酉凡二十一年

晉書曰超在位六年初德以安帝隆安四年僭立至超二世凡十一年以義熙六年滅

太平御覽卷第一百二十六

此八十一字以辨別太平... 昔晉曰蘇亦存六平... 陸谷浪起... 西秦乞伏國仁... 乞伏慕末... 北燕馮跋... 馮文通... 夏赫連勃勃... 赫連昌... 赫連定... 西秦乞伏國仁... 乞伏乾歸... 乞伏熾盤... 偏霸部十一

太平御覽卷第一百二十七

偏霸部十一

西秦乞伏國仁

乞伏乾歸

乞伏熾盤

乞伏慕末

北燕馮跋

馮文通

夏赫連勃勃

赫連昌

赫連定

西秦乞伏國仁

崔鴻十六國春秋西秦錄曰乞伏國仁隴西鮮卑人其先自漠北南出太陰山五世祖祐隣晉太始初率戶五萬遷居高平川隣卒于結權立遷于牽屯權卒于利邠立邠卒弟祁泥立祁泥卒邠子述延立遷于苑川延卒祁泥子儻太寒立石勒之滅劉曜也懼而還于麥田無孤山寒卒子司繁立秦皇始中遷于度堅山建元七年秦將王統來伐

繁率騎三萬拒統于苑川統潛襲度堅山部民五萬餘落
悉降于統繁乃詣統歸降符堅拜南單于留之長安後以
爲鎮西將軍鎮勇士川甚有威惠之稱司繁卒國仁卽位
聞堅征晉奔敗仁收衆至十餘萬又聞堅爲姚萇所殺於
是自稱大都督大將軍大單于領秦河二州牧秦建元二
十一年爲建義元年置武陵苑川等十一郡築勇士都城
以都之三年苻登遣使拜仁大將軍苑川王四年六月薨
僞謚曰烈王廟號烈祖

乞伏乾歸

崔鴻十六國春秋西秦錄曰乞伏乾歸國仁弟雄武有度
略仁薨羣寮以仁子公府幼稚乃立乾歸爲將軍大單于
河南王大赦改四年爲太初元年立妻邊氏爲后以南川
侯出連乞都爲丞相九月遷于金城二年正月苻登遣使

拜爲大將軍金城王六年立子熾盤爲太子七年登遣使
授左丞相河南王假黃鉞加九錫之禮十月氐王楊定步
騎四萬來伐歸勒衆而進大敗定軍斬定及首級萬有七
千於是盡有隴西之地十二月僭稱秦王大赦八年呂光
來伐歸乃稱蕃遣子勃勃爲質旣而悔之十三年秦征西
大將軍姚碩德率衆來伐入自南安峽歸次于隴西以拒
碩德興潛師繼發歸聞興至自率輕騎數千候興俄與中
軍相失爲興追騎所逼戰敗遁歸苑川乃率騎數百馳至
允吾秃髮利鹿孤迎歸處之於晉歸將叛謀泄懼爲利鹿
孤所害謂其子熾盤曰姚興方盛吾將歸之今送汝兄弟
及汝母爲質於是送熾盤兄弟於西平歸遂奔長安姚興
大悅拜河南諸軍事河州刺史歸義侯十四年姚興遣歸
還鎮苑川盡以部民配之十八年正月歸至自長安十九

年五月苑川地震裂十一月又朝于長安二十年姚興慮歸終爲西州之患留拜主客尚書以其子熾盤爲西夷校尉行河州刺史二十一年盤以長安亂將始乃招結諸部築城于嶮岷山以據之更始元年歸隨姚興如平流盤攻抱罕尅之遂遣使來告歸歸奔還苑川遂如抱罕留熾盤鎮之歸將衆二萬遷于度堅山諸將勸稱王七月僭稱秦王大赦改年置百官公卿以下皆復本位四年五月歸敗于五谿山有梟集于其手歸惡之六月爲兄子公府所殺公府出奔盤遷于抱罕遣弟廣武將軍智達追擒公府于嶮岷山南輾裂之八月葬歸于抱罕元平陵僞謚曰武元王廟號高祖

乞伏熾盤

崔鴻十六國春秋西秦錄曰乞伏熾盤乾歸太子歸薨自

稱大將軍河南王改年爲永康元年以尚書令翟就爲相國封拜各有差二年盤討吐谷渾別統屈達于渴渾川大破之俘獲男女二萬三年正月有五色雲起於南山盤大悅謂羣臣曰吾今年應有所定王業成矣於是繕甲整兵以待四方之隙五月聞僭檀西征率步騎二萬襲樂都僭檀降遂并南涼兵強地廣十月僭卽秦王位置百官立妻吐蕃氏爲王后四年盤子元基自長安逃歸拜尚書左僕射建弘元年立弟二子慕末爲太子領撫軍改年大赦九年盤寢疾顧命太子慕末乃薨于外寢六月葬武平陵謚文昭王廟號太祖

乞伏慕末

崔鴻十六國春秋西秦錄曰乞伏慕末字安石熾盤之太子幼而好學有文才建弘元年立爲太子盤薨僭卽秦王

位大赦改年爲永弘元年二月立子萬載爲太子三年九月部民多叛末焚城邑毀寶器率戶五千東如上邽爲赫連定所拒遂國南安十一月魏遣尙書庫結率騎五千迎末衛軍吉毗固諫以爲不宜遂內徙從之庫結引還四年赫連定遣其叔北平公韋代率衆一萬攻南安城內大飢人相食傳侍中乞伏延祚吏部尙書乞伏跋跋踰城奔代末乃銜璧出降送于上邽及宗族五百餘人悉爲赫連定所誅自國仁建義元年乙酉歲至辛未四十七載
晉書曰熾盤在位七年而宋氏受禪以宋元嘉四年死子慕末嗣在位三年爲赫連定所殺始國仁以孝武大元十年潛位至慕末四世凡四十有六載而滅

北燕馮跋

崔鴻十六國春秋北燕錄曰馮跋字文起長樂信都人其

先畢萬之後也子孫食棊馮鄉因以氏焉晉永嘉之亂祖父和避地上黨父安雄武有器量爲慕容永將永滅跋東徙和龍長樂中跋夜見天門開神光赫然燭於庭中永康末拜中衛將軍建始元年與二弟結謀襲殺慕容熙立高雲爲主正始元年以跋爲中外都督開府儀同三司錄尙書封武邑公太平元年雲爲離班桃仁所殺帳下督李垂等誅班及仁羣臣推跋爲主僭卽天王位大赦令曰義貴適時不必改作故陳氏代姜不徙齊號卽號燕國改爲太平元年追尊祖和爲元皇帝父安爲宣皇帝子永爲太子三年七月以太子永領大單于內置四輔七年建太學以長樂劉軒營丘張熾成周翟崇爲博士簡二千石已下弟年十五已上教之十四年宿軍地燃一旬乃滅十七年二月北部人趙壽女旣嫁化爲男娶妻而無子跋問諸羣

臣曰此何祥乎尚書左丞傅權對曰漢世雌雞爲雄陰變
爲陽君替臣僭之象卒有婦人專寵王莽篡奪今女爲男
臣將爲君之徵跋曰將何以讓之權曰桑穀生朝太戊脩
德而殷道中興熒惑守心宋景責躬延齡二紀唯脩身崇
善可以轉禍爲福十八年八月立子翼爲太子跋戒之曰
吾聞君人以學爲本不學無以立尊敬師傅人倫之始汝
其夙夜虔虔欽承明訓二十二年八月跋寢疾召中書監
申秀侍中陽哲於內寢謂之曰吾患當不濟卿等善相吾
子參決萬機九月跋疾甚輦而臨軒命太子翼勒兵聽政
以備非常宋夫人規立其子受惡翼聽政謂之曰上疾將
瘳奈何便欲代父臨天下乎翼性仁弱遂還東宮一日三
省疾宋夫人矯絕內外遣閹寺傳問而已翼及大臣皆不
得見跋弟弘於是舉壯士數十人裹甲入禁中宿衛皆不

戰而散宋夫人命閉東閣弘家僮庫斗頭勁捷有勇力踰
閣而入至于皇堂射殺女御一人跋驚懼而薨弘遣徇城
告曰天降凶禍大行崩背太子不侍疾羣公不奔喪疑有
逆謀圖危社稷吾備太弟之親遂攝大位以寧國家百官
叩門入者進階二等太子翼率東宮兵出戰敗退兵皆奔
敗弘遣使賜死命宗正馮哲黃門盧昭典葬事于東宮葬
跋於長谷陵僞謚文成皇帝廟號太祖

馮文通

崔鴻十六國春秋北燕錄曰馮弘字文通跋之季弟高雲
篡位拜中領軍封汲郡公太平元年拜尚書右僕射改封
中山公遷尚書令司徒錄尚書事跋薨僭卽天王位大興
元年正月壬午朔大赦改年二月立夫人慕容氏爲皇后
二年正月立少子王仁爲太子六月有鼠集城西盈數里

地中西行至水前者銜馬尾後者迭相銜尾而渡識者以爲民遷之象七月魏師來伐神高八月石城遼東營丘城周四郡並降魏九月魏師引還徙民四萬餘戶而西三年六月魏永昌王健來伐五年四月遣右衛孫德乞師于宋十二月又遣尚書陽伊請迎于句麗六年三月端門崩四月魏又遣侍中建興公虞彌東平公鵝青來攻尅白狼句麗將葛居孟光率衆數萬隨陽伊來迎屯于臨川尚書令郭生因民之憚遷開門而引魏軍魏軍疑而不赴生遂勒衆攻弘弘引句麗兵入自東門與生戰于闕下生中流矢卒句麗軍旣入城取武庫甲以給其衆城內美女皆句麗軍人所掠五月乙卯弘率龍城見戶東徙焚燒宮殿火一旬不絕令婦人被甲居中陽伊等勒精兵於外葛居孟光率騎後殿方軌而進前後八十餘里魏軍追至遼水不擊

而還遣使徵弘于句麗後二年爲句麗所殺僞謚昭成皇帝自馮跋太平元年歲在己酉至弘滅亡之歲丙子二十八載

夏赫連勃勃

崔鴻十六國春秋夏錄曰赫連勃勃朔方人右賢王去卑之後劉元海之族也會祖父劉虎前趙嘉平中以宗室封樓煩公拜安北將軍丁零中郎將祖父豹後趙建武中拜平北將軍左賢王父衛辰苻堅以爲西單于督攝河西諸虜屯于伐來城因秦末兵亂遂有朔方之地控弦之士三萬八千姚萇拜辰大將軍河西王大單于魏師來伐辰遣子右地伐率騎二萬拒戰河東爲魏所敗遂乘勝濟河攻尅伐來執辰殺之勃勃辰第三子奔秦高平公沒奔于妻之以女姚興以勃勃爲持節安北將軍五原公配以三交

五部鮮卑及雜虜二萬餘落鎮朔方時河西鮮卑杜崙獻馬八千匹于秦濟河至大城勃勃留之召其衆二萬襲殺高平公沒奔干而并其衆衆至數萬自稱天王大單于大赦改弘始十年爲龍昇元年置百官以匈奴夏后氏之苗裔僭稱大夏以大兄右地代爲丞相封代公發嶺北民夷十萬於朔方黑渠之南營起京城大赦改龍昇七年爲鳳翔元年令曰朕之皇祖北遷幽朔改姓妣氏後從母爲劉氏子從母姓非禮也古人氏族無常王者繫天爲子是爲徽赫實與天連今改姓曰赫連氏庶協皇天之意支庶非正統者以鐵伐爲氏庶朕宗子剛銳如鐵皆堪伐人二年立夫人梁氏爲后立子瓚爲太子四年九月劉裕滅秦入于長安十二月裕留子義真鎮長安而還勃大悅遂圖進取之計遣太子瓚率騎二萬南伐長安五年義真遣龍驤

軍沈田子率衆逆戰瓚擊敗之退屯劉迴堡八月勃進據咸陽劉裕大懼乃召義真東鎮洛陽勃入長安正月羣臣勸勃稱皇帝三月築壇于霸上卽皇帝位大赦改鳳翔六年爲昌武元年冬十月以太子瓚領大將軍雍州牧錄南臺尚書事鎮長安十一月勃勃還統萬統萬勃勃所都城之名也宮殿大成大赦改昌武二年爲真興元年刻石都南頌紀功德四月追尊父衛辰曰相皇帝廟號太祖母苻氏爲相文太后祖豹曰宣皇帝曾祖虎曰景皇帝高祖訓兒曰元皇帝五月雨魚于統萬二年十月起冲天臺于統萬南山欲登之以望長安六年勃將廢太子瓚爲秦王以酒泉公倫爲太子瓚聞將廢己率衆七萬北伐倫倫率騎三萬拒之戰於平城爲瓚所敗倫死之太原公昌率騎一萬襲殺瓚率衆八萬五千歸于統萬勃大悅立昌爲太子七月勃

寢疾八月疾甚輦昇永安殿召羣臣屬以後事薨於永安殿年四十五謚武烈皇帝葬嘉平陵廟號世祖

赫連昌

崔鴻十六國春秋夏錄曰赫連昌一名折勃勃之第三子身長八尺魁岸美姿貌勃葬卽位于永安臺大赦改眞興七年爲承光元年七月杏城劉睹川有青石大如馬頭浮在水上逆流而行人見而送之十月魏乘虛來伐三年五月戰于黑渠爲魏所敗昌與數千騎奔還魏追騎亦至昌留河內公費連烏提守高平徙諸城民七萬戶于安定以都之四年二月魏軍至安定三月城潰昌奔秦州魏東平公鴟青追擒之送于魏魏封昌秦王尙始平公主尋爲魏所殺

赫連定

崔鴻十六國春秋夏錄曰赫連定勃勃第五子鳳翔二年封平原公雍州牧鎮長安率衆赴安定進封平原王大將軍領司徒昌爲魏所擒定遂率遺衆數萬據平原僭稱皇帝大赦改承光四年爲勝光元年進征南大將軍白蘭王吐谷渾莫瓚爲開府儀同三司河南王十月畋于陰盤登苛藍山而望統萬城泣曰先帝以朕承大業者豈有今日之事乎使天假朕年當與諸卿建王季之業俄而有羣狐百數鳴於定傍命射之無所獲定惡之曰此大不善咄咄天道復何言三年九月魏軍來襲十月尅安定進攻平原十一月定遂掠民五萬戶西奔上邽四年河南王莫瓚因戎狄之衆東面以爭天下魏遣益州刺史沒利延寧州刺史拾虎率騎三萬來伐遂擒定送于魏勃勃初號龍昇元年歲在丁未至是歲在辛未二十五載也

